

IRA JOAN ISANGUENATOCOQUERI JESOQUIRISITO ITOMI TOSORINTSI

Cara imatsiguengatapë Quirisito.

¹ Cara jiraisonoriguinte cara teraiquerai ine quibatsi ainta Quirisito Ira aisati icantaro pibega Irinibare Tosorintsi yoniaganta ati icanta Tosorintsi, aisati itiomokeri Tosorintsi, Irironta Tosorintsi. ² Cara jiraisonoriguinte itsibatari Tosorintsi. ³ Cara jiraisiori yobetsicanëro antagaisati ora inatsi. Teni ine pairoraca ora aniaigui yamai ora te irobetsiquiro Iriro. ⁴ Iriro timagantatsiri caniatagantatsiri. Ipaguetëri cara intimaiganaque përosati matsiguenga. Aisati Iriro osangueguiteserëtocotiri matsiguenga cara yoniagaigacari Iriro caninarisonori. ⁵ Iriro aisati icantaro pibega cataguiteri ora osangueguitetaguetero cara posibitanëro ora tsitiniri. Aisati Quirisito osangueguiteserëtocotaigui matsiguenga cara igótacaqueri ora icantaguetero te onganinate. Yaca quibatsica aiti tojai ora te onganinate cantaca tsitiniri, carari ora tsitiniri te ogabeiro te ogatsibaquiro ora cataguiteri.

⁶ Tosorintsi igáqueri ira sërari jitacha Joan. ⁷ Iroro ipoguëque Joan arota ingomantëgotiri Quirisito Ira osangueguiteserëtocotaigui matsiguengajegui arota inguemisantaigueri. ⁸ Joan cagari Quirisito. Iroonti ipocobique

ingomantëgotiri Quirisito Ira osanguëguitetocotiri matsiguenga. ⁹ Iriro cantaca Cataguitersonori yosanguëguitetocotiri antagaisati matsiguenga cara ipoque Iriro yaca quibatsica.

¹⁰ Jiraissonori yobetsiquëro Quirisito antagaisati. Carari cara inasegui yaca quibatsica te irogótaigabaqueri matsiguenga te irágacanınataigabaqueri Itingomi. ¹¹ Ipoque irasiquë iguebatsite, imatsiguengatabitapari joríojequi carari te irágaigabaqueri imatsiguenga. ¹² Carari aintapague ágobëri iquemisantobëri. Aito cara itomintaigacari Tosorintsi iniaiguëri caninari aisa icanta iniaqueri caninari Itomi Ira Jesoquirisito. ¹³ Ira quemisantobëri Quirisito, përosati itimacagajiri Tosorintsi, yogabisaicotajiri. Carari te iragabisaicotajiri Tosorintsi iriantinta quemisantatsi iriri. Quero yogabisaicotaja iriati. Quero yogabisaicotobaga matsiguenga iriati. Paniro iragabisaicotajiri matsiguenga Tosorintsi cara inguemisanqueri Itomi.

¹⁴ Ira Quirisito ipaniaca Jonogaguitequë, imatsiguengatasantapë cara otsomaaqueri iniro, itiomotaigapëna naroequiquë. Nantiasantaigabaqueri caninarisonoriguente. Iriro paniro Itomi Tosorintsi Ira igáque yaca quibatsica. Iriro cábintsasantaigapërine matsiguenga irojocajineri ora icantagueti te onganinate aisati quero iquengairo aroquenta inintasantaigapëri. Aisati patiro inibatiro Iriro ora aisonori. ¹⁵ Joan icomantëgotëri, icantaiguëri matsiguenga catsigue:

—Iriro Ica nacantocoque cani cara nacanque:

“Yamai aintana naro yaca. Aiquenta coraque iribocapë Irirõ Ira Atingomisonori. Ibaquina Irironta caninarisonoriguinte. Ira te aisati ingantina nibega naro aroquenta irinaga ini Irirõ jiraisonoriguinte”.

¹⁶ Irironta caninarisonoriguinte icábintsagueiganacái. Aiquero iátanëtigue icábintsasantaiganacái. Aisati icantaneintëgotacái.

¹⁷ Jiraisonori isanquenaquero Moisés ora igáantë Tosorintsi. Carari yamai icábintsasantacái Jesoquisito aisati ipaigacáiro ora aisonori.

¹⁸ Teni pairi neirine Tosorintsi. Paniro ini Itomi itimacaqueri Iriri jiraisonoriguinte. Igótacacái Irirõ ati icanta Iriri.

Joan icomantëgotëri Quirisito.

(Mt 3.11-12; Mr 1.7-8; Ir 3.15-17)

¹⁹ Cara Jerosarénquë igátaiguëri jorío ira saseriroti aisati imatsiguenga Irebí. Ipocasipëri cara inasegui Joan, yosamitaigapëri:

—¿Pairibi obiro? ¿Obiroco Quirisito Ira agabisaicoontatsi?

²⁰ Icomantëgotaca Joan yotabitobëri:

—Cagarina naro Quirisito Ira agabisaicoontatsi.

Catingasati icantaigabaqueri Joan. ²¹ Aisati yosamitaiguëri:

—¿Pairibi obiro? ¿Obiroco Erías?

Icanque Joan:

—Cagarina naro Erías.

Aique yosamitairi:

—¿Obiroco comantantatsiri ira isanguenato-coque Moisés jirai?

Yotabitobëri:

—Cagarina naro.

22 Aique icantaiguëri saseriroti aisa imatsiguenga Irebí:

—¿Pairiroco pijitara obiro? ¿Pairo pinibatëgotëma obiati? Nocogaiguini pingomantëgotima, ora non-gomantaigapairi ira agáquina.

23 Icanque Joan:

—Naanti comantantatsiri cara tera ontimin-gani ira isanguenatocoque Isaías jiraisonori cara icanque comantantatsiri:

Pobetsicoboquitineri irabo Atingomi.

Ora ocanti piganinatineri paneingomento.

24 Ira osamitaiguëri Joan iriantiegui iragátane bariseo. 25 Yosamitairi aisati:

—Cagaribica Quirisito Agabisaicoontatsiri, cagaribica Erías, cagaribica comantantatsiri ira isanguenatocoque Moisés cara jiraisonori; ¿Pairo pobaotisabiritaiguëri matsiguenga?

26 Joan icantaiguëri:

—Naro baotisantaro nija, carari ainta omatsiguengaquë Ira te pigóigueri. 27 Aiquenta iribocapë. Ira te aisa ingantina nibega naro. Nitsoingaa naati tenta ongomeite nantsibatimari Irironta obaquina. Iriro caninarisonori Natingomi.

28 Omagaro oca icanquero Joan cara poeboroquë jitacha Betania cara onamijaquë Jorirán ai-
quero cara iconyeti paba. Canta ibaotisataiguëri matsiguenga Joan.

Aisati icomantëgotairi Quirisito Joan.

29 Cara oquëtaguetanai Joan iniobëri Jesus ipogopë, aro icomantaiguëri matsiguenga icanque:

—¡Pinetsaigabaqueri Ira iragátane Tosorintsi! Aisati icantari ibega itiomijani oisha ira ogamagaigui. Aisati Iriro camobitaiguërine antagaisati matsiguenga irágopitaguetajiri ora icantagueti te onganinate. ³⁰ Iriro nocomantëgotë cani cara nacanque: “Yamai aintana naro yaca. Aiquenta coraque iribocapë Ira obatina Irironta caninarisonoriguinte irinaganta itimatá cara jirasonoriguinte”. ³¹ Teni pigógueri obiro. Teatisati nogótiri naro carari igáquina Tosorintsi cara nongomantëgotëri Quirisito arota irogógueri omatsiguenga. Iro ro nobaotisantobitaro nija cara noniaganqueri Iriro.

³² Përosati icomantëgotëri Jesos Joan icanë:

—Naniobëro cara paguëpë Isëre Caninaro Tosorintsi aisa ocampari ibega sompaguiti pinampari. ³³ Cara terai nogótiri naro, Ira agáquina nobaotisantaro nija icanquina: “Cara piniobëro Caninaro Nasëre oguëtasipëri sërari aitosati pinampëmari, Ica sërari Ira baotisanquimarone Caninaro Nasëre, ora ocanti imëmiroti Nasëre”. ³⁴ Aroque naniaquero. Aro yamai nocomantëgotiri Ica Iriro Itomi Tosorintsi.

Jesos icaimëri irogomere.

³⁵ Oquëtaguetanai aintasati inasegui Joan aisati pite irogomere. ³⁶ Iniobëri Ira Jesos cara yabisanaque, icanqueri irogomere Joan:

—¡Pinetseri Ira sërarira! Iriro aisati icantari ibega itiomijani oisha igácáiri Tosorintsi.

³⁷ Ira pite irogomere Joan iquemaqueri aro yoguiatanëri Ira Jesos. ³⁸ Cara iniobëri pitirooti Jesos inebintanaca, icabëri:

—¿Pairo picogui?

Yotabitanëri:

—Ogomeantatsiri, ¿Nega pitimi?

³⁹ Yotabitobëri Jesus icanqueri:

—Jooaigue pinetsënte.

Aique yoguiatëri cara itimiri. Aro inibatobaca irooti cara ochapiniguitetanë. ⁴⁰ Ainta piteni ira quemisanqueri Joan aique yoguiatanëri Jesus. Paniro ijita Antiris ireinti Simón Peroro. ⁴¹ Iritsita Antiris icoganëri Simón ireinti iniopëri icampëri:

—Aroque naniaqueri Ira Quirisito.

Quirisito ocanti Agabisaicoontatsiri. ⁴² Antiris yáganëri ireinti cara Jesusiquë. Icabëri Jesus ira Simón:

—Obiro pijita Simón, itomi Joan. Yamai najitajimi Sejas aisati Peroro oca ocanti mopë.

⁴³ Oquëtaguetanai ipintsataca Jesus iriátë cara Garireaquë. Aique iniaqueri ira Jeripe, icanqueri:

—Piguiatapëna.

⁴⁴ Ipaniaca Jeripe cara poeboroquë jitacha Bet-saira. Aisati Antiris aisa Peroro pitirooti Bet-sairasati. ⁴⁵ Aique iáque Jeripe icoqueri Natanael, icanqueri:

—Aroque naniaiguëri ira isanguenatocoque Moisés jiraisonori cara isanguenaque ora iragáantane Tosorintsi. Aisati isanguenatoco-taiguëri comantantatsirijegui. Iriro Jesus, itomi José Nasaresati.

⁴⁶ Yotabitobëri Natanael yosamitobëri:

—¿Aintaco caninari paniacha Nasarequë?

Icanqueri Jeripe:

—Jooque pinetsëntiri.

⁴⁷ Cara iniobëri Jesus ira Natanael icantoco-
queri:

—Pinetseri caninari jorío ira te iromatobiante.

⁴⁸ Aique yosamitëri Natanael Ira Jesus, ican-
queri:

—¿Pigóquinaco?

Icanëri Jesus:

—Naniaquemi cara teraiquerai ingaimimi
Jeripe, cara pinasegui otabiquë panguirintsi
jitacha iguera.

⁴⁹ Yotabitanairi Natanael:

—Ogomeantatsiri, Obiro Itomi Tosorintsi.
Obiro Itingomi joríojegui imatsiguenga Isirael
jiraisonori.

⁵⁰ Icanqueri Jesus:

—¿Piquemisanquina aroquenta nocomantëmi
naniaquemi cara pinasegui otabiquë
iguera? Aiquenta piniobëro basini tojai, aro
pinguenganeintasantanëma. ⁵¹ Aisonori yamai
nocomantaiguëmi nopaniaca Jonogaguitequë
nomatsiguengatapë cara niboguë yaca
quibatsica. Aiquenta piniobëro Jonogaguite
osirianaquima, aisati piniagabaqueri ironomire
Tosorintsi iragainocanëma jonoquë cara Naroquë
aisati iraguëpë.

2

Yoguibatëro itasorintsite Jesus.

¹ Omoncaraca maba cataguiteri cara yáguëro
iina sërari cara poeboroquë jitacha Caná cara
Garireaquë. Aintasati pinasegui iniro Jesus.

² Aisati icaimëngani Jesus aisati irogomere cara

yapatotaigaca igaimanejegui. ³ Cara pitsoatanaca oja oba aro ocanqueri iniro Jesus:

—Tsoatanaca obaa.

⁴ Yotabitanëro Jesus:

—Atsi caraquenta, ina. Terai oretima catagui-teri cara noniaguëmari matsiguenga cara nomitocotageantëmari natasorintsite.

⁵ Aro iniro ocanqueri iromeraro ira quitiro obaa:

—Pairorapagueraca iragáquemi Jesus, pingantiro.

⁶ Aiti pinasegui oquibe chomo ocarati 6 ora yogantaro nija ora yoguëtetantagueta jorío. Patiro chomo ojaquima nija 100 iritoro. ⁷ Aro igáqueri Jesus:

—Pijaguiro nija cara chomoquë antagaisati cara ocarati 6.

Icanquero. Iagasantëro irooti otseraquë.

⁸ Aique icanqueri Jesus:

—Pinguiate arosata yamai. Páganëneri ira agáantiro jiesita.

Aro yáganëneri. ⁹ Cara iniantacaro iriro ora nija pegacha obaa, te irogóte negaraca opaniaca. Irianti iromeraro ogóiguëro cara ipiaquero Jesus irironta jagaiguëro nija. Aro ira agáantiro jiesita icaimëri sërari águëro iina ¹⁰ icabëri:

—Ametaigaro eiro cara omagaro poguibatagani iróquimaro ora obaa caninajaro. Aique cara iróquimaca tojai ira igaimane; aro cara imëgotaiguëri ora obaa te opënatima tojai. Carari obiro poguëro ora caninajaro obaa irooti yamai.

¹¹ Cara poeboroquë jitacha Caná cara Garireaquë yoguibatëro Jesus itasorintsite.

Yoniaganca arota irogóigueri matsiguenga Iriro caninarisonori aisati sintsirisonori. Aro iquemisantaiguëri irogomere Jesus.

Itimaque Jesus cara Caperinaoquë.

¹² Aique iáque Jesus cara Caperinaoquë. It-sibatáro iniro aisati icarataiguëri ireinti aisati irogomere. Cara, itimaiguë arosata cataguiteri.

Ijocaiguëri Jesus ira pimantatsiri cara ibango-quë Tosorintsi.

(Mt 21.12-13; Mr 11.15-18; Ir 19.45-46)

¹³ Pënibaque orequima cataguiteri ora jítacha Pásicoa cara iquengapiantaiguero joríojegui cara jiraisonori isotocaigai Ejípitoquë. Aro iáque Jesus Jerosarénquë. ¹⁴ Iniopëri cara oquibequë pongotsi irasi Tosorintsi ira pimantaiguëri oisha, aisati sërari baaca aisati paroma. Aintasati ira campiatiri quirequi. ¹⁵ Yobetsiquëro iripasamento Jesus iroonti sogatsa. Aique ijocaiguëri antagaisati pimantatsiri aisati ibaacate aisati iroishate. Yosibiquero imesane ira campiatiri quirequi yosocaguitëri iguireguitë.

¹⁶ Icanqueri pimantatsiri paroma:

—¡Páganëri satora! ¡Quero popimantaguetiri yaca ibangoquëca Pabati Tosorintsi!

¹⁷ Aique iquengaigairo irogomere ora Sanguenari cara ocanti:

Nocogasanti iraniacaninatiro pobango matsiguenga. Iroro ora inguisanijintaguëquina naro aisati ingoque iróquena.

¹⁸ Yosamitaiguëri joríojegui:

—¿Pairo poniagaiguëna ora nogóontimi Obiro cara igáquemi Tosorintsi picanquero negaca?

¹⁹ Yotabitanëri Jesus:

—Pogomeriguetro oca pongotsica. Cara omon-caraquima maba cataguiteri nobetsicaïro aisati.

²⁰ Icantaiguë jorío:

—Tojai osarini ocarati 46 cara pobetsiquëngani oca oquibe pongotsica irasi Tosorintsi. ¿Yamai picanque Obiro pobetsicaïro mabanti cataguiteri?

²¹ Carari Jesus te irinibatocotiro pongotsisonori oquibe. Iroonti inibatëgotë ibatsasonori aisatinta ocantaro pibega ibango Tosorintsi. ²² Iroso cara aroqueque icamaque Jesus icaniatanai, iquengaigairo irogomere oca nibarintsica, aro iquemisantaiguëro Sanguenari aisati iquemisanque ora yogometaguëri Jesus.

Jesus igótasantaiguëri matsiguenga.

²³ Cara Jerosarënguë aiti cataguiterpague jítacha Pásicoa cara yapatotaigaa jorío. Itasor-intsitaguetasanotapë Jesus iquemisantacagopëri tojai matsiguenga cara iniaigabaquero iquemisantaigabaquero ora icanque Iroso.

²⁴ Carari te imemari ira matsiguenga igóquerinta ora iquengaigaca omagaro. ²⁵ Igóque ora iquianca antagaisati matsiguenga. Aro te ingogue basini comantirine ati icanta matsiguenga igóquerinta iraneingomentojeguiquë sërari.

3

Nicoremo ipocasipëri Jesus.

¹ Ainta inasegui sërari jítacha Nicoremo. Iroso bariseo. Aisati irroso itingomi jorío. Aintasati basini itingomipague jorío. ² Cara tsitiniriquë ipocasipëri Jesus Nicoremo, icampëri:

—Ogometinari, nigóiguë Obiro iragátane Tosorintsi tenta irineni pairiraca intasorintsitë cantimine pibega Obiro pitasorintsitasanoti queroca itsibatari Tosorintsi.

³ Yotabitobëri Jesus icabëri:

—Nangantasantëmini, queroca Tosorintsi itimacagajiri matsiguenga yoganiasëretairi, aisati queroca ibogai irirai, quero yareta Jonogaguitequë cara itimi Tosorintsi aisati igáanti Iriro.

⁴ Yosamitëri Nicoremo:

—Aroca antiasiparitanë ¿Atiroco anganaima cara iboganaje aisati? ¿Atiroco anganaima cara anganajiro aniro cara iboganaje aisati?

⁵ Icomantëri Jesus:

—Nangantasantëmini queroca itimacagajiri yoganiasëretairi matsiguenga Tosorintsi cara Irinibarequë aisati Isërequë Tosorintsi, quero íati Jonogaguitequë cara itimi Tosorintsi aisati cara igáanti Iriro. ⁶ Ira otsomaaque iniro, irianti imatsiguenga sërari. Ira yoganiasëretairi itimacagaji Isërequë Tosorintsi, imatsiguengatacari Tosorintsi aisati. ⁷ Quero piquenganeintasanta aisati que-rootisati omabocaguimi ora nacanquemi: “Panibanibi intimacagajimi Tosorintsi”. ⁸ Ora coguentima ocoguentimaguiteti. Piquemobëtiguero cara ojigocanëma, carari te pigóte negaraca oquenopë, teatisati te pigóte negaraca ojátagueque. Aisati ocantari ibega ira itimacagaji Isërequë Tosorintsi. Pigótocoqueri ira irirai itimacagaji Isërequë carari te pineiro Isëre Tosorintsi tenta oneingani.

⁹ Aique yosamitairi Nicoremo:

—¿Atiroco ocanta oca picanquinaca?

¹⁰ Yotabitanëri Jesus icanqueri:

—¿Obiro ogomeantatsi cara omatsiguengaquë teco pigótiro oca nacanquimica? ¹¹ Aisonori nanganquimi ninibatëgotëro ora nigóigui. Aisati ora naniaiguë irooti nocomantëgotë. Carari obirojegui teni pinguemisantaigabaquero ora nocomantaiguimi. ¹² Teca pinguemiro cara ninibatëgotaiguëmiro ora inatsi quibatsica, ¿Atirasatico pingantiro cara pinguemobëro cara nanibatëgotëro ora paniënguicha Tosorintsiquë? ¹³ Te pairi játatsine Jonogaguitequë. Paniro Naro, Naronta paniënguicha Jonogaguitequë. Nomatsiguengatapë cara niboguë yaca quibatsica. ¹⁴ Jiraisonori Moisés itinaaquero irosiacagomento marangue jonoquë anchapoaquë cara te ontimingani aisa onganquima inganquina nibega Naro cara iribëquëgotëquina jonoquë ¹⁵ arota pairiraca quemisanquinane iraganciasëretairi intimacagajiri Tosorintsi arota quero iáti Sharincabeniquë, carari përosati cara intiomoquena Jonogaguitequë.

Përo icanque Jesus:

¹⁶ —Tojaisonorinta Tosorintsi inintasanoiguiriri matsiguengajegui, igáquena yaca quibatsica. Naro Itomi paniro. Igáquena arota pairiraca quemisanquinane nantimacagajiri, quero iáti Sharincabeniquë, carari përosati intiomoquena Jonogaguitequë. ¹⁷ Tosorintsi teni iroro iragábirritina Naro Itomi yaca quibatsica cara nangasitígataigueri matsiguenga. Igáquena arota nagabisaicoqueri matsiguenga ira quemisanquinane. ¹⁸ Quero icasitígatiri Tosorintsi ira quemisanquina Naro Itomi paniro, carari

aroque icomantëgotëri ira te inguemisantina iriátë Sharincabenuquë tenta inguemisantina. 19-21 Cara icantagueigui matsiguenga ora te onganinate, icoguini inganquero cara tsitiniriquë. Teni iraninte ingantiro cara cataguitëriquë tenta iraninte iripasiguite cara iraniaiguëri imatsiguenga. Naro aisati nacantaro pibega cataguitëri aronta nopasiquitacaguri cara nogótacaguri matsiguenga icantagueigui ora te pojocajenga arota iripasiguitanë. Iroto iguisaneintobitaiguina. Aroque Tosorintsi icomantëgotaiguëri iriro iriátë Sharincabenuquë tenta iranintaigue inguemisantina. Irari ira cantaguetiro ora caninaro irotsitipëna tenta iripasiguiteni. Iroonti icanque caninasati cara imitocoqueri iriro Tosorintsi.

Iroto oca icanquero Jesus ira Nicoremo.

Aisati icomantëgotairi Jesus Joan.

22 Aique iáigai Jesus aisati irogomero cara Joreaquë. Cosamani itimaiguë cara ibaotisataguëri matsiguenga. 23 Aisati Joan ibaotisatantagueque cara poeboroquë jitacha Enón aitoniatiquë basini poeboro jitacha Sarím aronta pini nija tojai. Ipogaigapë matsiguenga ibaotisatagabaquero Joan 24 cara teraiquerai iromingueri Eroris ira Joan. 25 Ipëgatsatobaca irogomero Joan aisati itingomi jorío. Inibatëgotëro cara ati ingantima iraguëtetaima matsiguenga. 26 Ipocasipëri jorío icampëri ira Joan:

—Ogometinari, Ira tsipatimi cara onamijaquë Jorirán cara icontetipaba, Ira pinibatëgotë cani,

yamai ibaotisatëri matsiguenga. Yoguiataiguëri tojai matsiguenga.

²⁷ Yotabitanëri Joan icanque:

—Quero pairi asintachane pairoraca, queroca ipiri Tosorintsi. ²⁸ Piquemaiguëna obineniati cani nocomantëmi catingasati cara cagarina naro Quirisito Agabisaicoontatsiri. Patiro igáquena Tosorintsi nongomantëgotiri cara teraiquerai ingonijapë Iriro. ²⁹ Naro cantari iramigote ira águëro iina. Iramigote inganinatanë cara inguemobëro irinibare. Nacaninatë naro yamai aroquenta yoguiataiganaqueri Jesus matsiguenga. ³⁰ Aiquero iriátanëtigue Iriro irobotanëna. Carari naro aiquero najátanëtigue nangarantanae. ³¹ Ira paniacha jonoquë Iriro obatatsi antagaisati. Naro paniacha quibatsica. Ninibatëgotiro ora inatsi quibatsiquë. Quirisito iquenopë Jonogaguitequë. Iriro obatiro antagaisati Iironta Atingomi. ³² Icomantëgotëro Iriro ora iniaque aisati ora iquemaque cara jonoquë, carari teni inguemisantiri matsiguenga ora icanti Iriro. ³³ Ira quemisantobërone ora icomanti Quirisito, irogóque cara icanti Tosorintsi ora aisonori. ³⁴ Tosorintsi agáqueri Quirisito. Inibatiro Irinibare Tosorintsi aroquenta ipasanoqueri Caninaro Isëre Tosorintsi Ira Jesus. ³⁵ Aisati inintasanoqueri Itomi Tosorintsi, iroero ipasanotaguëqueri omagaro arota iragáantaquetiro. ³⁶ Ira quemisanquerine Itomi Tosorintsi intimacagajiri Tosorintsi aisati përosati intiomoqueri cara Jonogaguitequë. Ira te iraninte inguemisantiri Itomi quero itiomotiri,

caraanti iriátë Sharincabeniquë aroquenta
iguisëri iriro Tosorintsi.

4

Iáque Jesus cara Garireaquë.

(Mt 4.12; Mr 1.14)

¹⁻³ Ira barisesoegui iquemocoqueri Jesus cara
ibaotisataiguëri tojai matsiguenga. Ibatajiri Joan
tojoininta irogomere Jesus. Carari te Iriro ba-
tisatantatsine Jesus irianti igáti irogomere imao-
tisataiguëri matsiguenga. Cara igóque Jesus ora
icanti bariseo, aro iáigai Jesus aisa irogomere,
isotocaiganaji cara Joreaquë, aique iáigai aiqhero
cara Garireaquë.

Yogomequero Jesus ora Samariasato.

⁴ Icoque Jesus inguenantaigaimaro abatsi que-
nacha Samariaquë. ⁵ Yareca poeboroquë jitacha
Sicar aronisati iguebatsitequë José ora ipëri cara
jiraisonori iriri jitacha Jacob. ⁶ Pinasegui iguinare
Jacob cara yáguero nija jirai. Aro imagotë Jesus iso-
bigopë iguinarequë catanga paba. ⁷⁻⁸ Aroqueque
igáqueri irogomere Jesus iriáiguë poeboroquë iro-
manantaiguënte perintsi. Aro pipogopë tsinane
Samariasato cara onosiquëgotënti nija. Yobetsato-
bacaro Jesus icabëro:

—Pomena nija.

⁹ Ocanqueri Samariasato:

—¿Pairo pamanobiquina nija Obiro jorío?
Naanti Samariasato.

Ocanque negaca iguisanijintobaganinta
joríojegui aisati ira Samariasatiegui.

¹⁰ Yotabitanëro Jesus:

—Arome pigóque ora icogabeca Tosorintsi imëmi aisati pigóquiname Naro manimiro nija, aro pomanocoquina nija obiro, aro nomëmi nija timacagantatsiri arota pintimanë përosati.

¹¹ Ocanqueri tsinane:

—Ogomeantatsiri, teni ine obiro ora páganquimaro nija aisati tsoaguisonorinta pini nija. ¿Nega páguëro ora nija timacagantatsiri ora pomëna cara nantimanë përosati? ¹² Jacob nomatsiguenga jiraisori iquiaquinaro oca cara nacaiguero ora yóga iriro jirai aisati itomijegui omagaro ibiraegui. Iroonti caninajaro nija. ¿Yamai pijiquenico pomëna basini nija caninajarisonori? ¿Pobaquerinico Obiro Jacob?

¹³ Yotabitanëro Jesus:

—Antagaisati ira ógaro oca nijaca, aisati iromiretae. ¹⁴ Irari óguëmarone nija ora nomëri Naro quero imiretai. Iroronta nija ora nomëri ocontetanëri isërequë onganquima cara picontiati nija. Ongantacaquimari përosati intiomoqueri Tosorintsi cara Jonogaguetequë.

¹⁵ Aique ocanqueri tsinane:

—Ogomeantatsiri, pomena ora nija timacagantatsiri querota nomiretai, querootisati nipocaji yaca nonosiquëgotai nija.

¹⁶ Icanquero Jesus:

—Pijáte pingaimëntiri pijime popocaigapë yaca.

¹⁷ Potabitanëri iroro:

—Teni irine najime.

Jesus icomantëro icanque:

—Aisonori teni irine pijime. ¹⁸ Aroque páguë pijime icarati pabocorooti. Irari ira águimi yamai cagari pijime. Aisonori picanque teni irine pijime.

19 Ocanqueri tsinane:

—Ogomeantatsiri, ¿Ati picanta cara pigótocoquina? ¿Obiroco comantantatsiri?

20 Jirai yamanocoqueri nomatsiguengajegui Tosorintsi yaca oguitojaica. Obirojegui jorío picantaigui te ongomeite yaca. Picantaigui patiro nomanocotaiguëri canta Jerosarénquë. ¿Nega ocaninati nomanocotaiguëri Tosorintsi?

21 Yotabitanëro Jesus:

—Pinguemisantina, tsinane. Coraque catagui-teri cara quero pamanocotiri Pabati Tosorintsi yaca oguitojaica querootisati pamanocotiri canta Jerosarénquë. 22 Pamanocotaiguëri obiro

Ira te pigóiguëri. Naroegui jorío nigóiguëri Ira namanocotaigui Irironta agabisaicoontatsi ipaniaca cara naroeiguiquë Irironta jorío.

23 Yamai aroque pareca catagui-teri cara iromanocotasantiri quemisantatsiri aronta omitocotiri Isëre Tosorintsi ogomequeri ora aisonori. Irironta icogui Pabati Tosorintsi iromaniri antagaisati ira coguëri Iriro. 24 Teni iraneingani Tosorintsi tenta ine ibatsa, iroonti Isëre. Irironta patiro yamanocotiri isërequë matsiguënga aisati yamanocoontari Irinibarequë Tosorintsi ora aisonori.

25 Ocanqueri tsinane:

—Nigóque cara iribocapë Agabisaicoontatsiri Ira jitacha Quirisito aisati. Cara iribocapë ingo-mantagueiguenaro omagaro.

26 Icanquero Jesus:

Naromë Quirisito ira nibatacaguimira.

²⁷ Aito cara yaretaigapa irogomere Jesus. Iquenganeintaiganaca cara inibataseguero Jesus tsinane, carari te pairi osamitapërine ¿Pairi pini-babiritiro?

²⁸ Aique ojocanëro tsinane ogaamento piáque poeboroquë. Ocomantaguequeri omatsiguenga:

²⁹ —Popocaigapë piniaguero sërari aroque icomantënaró antagaisati ora nacantagueti. ¿Iriropeera Quirisito?

³⁰ Isotocaiganaque Samariasati poeboroquë aique iáiguë cara inasegui Jesus. ³¹ Teraiquerai iraretaigapëmari Samariasati icantopiantëri Jesus irogomere icanqueri:

—Ogometinari, pope.

³² Carari icanqueri Iriro:

—Aiti noperi ora te pigóiguero obiro.

³³ Aique yosamitobaganaca irogomere icanque:

—¿Aintaco matsiguenga mapëneri iraperi?

³⁴ Icanque Jesus:

—Cara aroque opaiguë, teni anguenguero operi. Aisati cara nanganquero Naro aisati notsonquineri ora ininti Tosorintsi Ira agáquina, nanganinatanë. Teni nanguenguero noperi tenta natasegue. ³⁵ Picantaigui obiro: “Itsibasatinibani manchacori obiguitëma tirigo”, carari nanganquemi Naro: “Pinetsaiguero matsiguenga. Irirojegui cantaca osamatagasonori tirigo panibati obiguitëma. Ira matsiguenga panibati pinguemisantacaguiri”. ³⁶ Ira obiguitiro tirigo irágobëro ora iripënabentëri casintaro. Aisati ira quemisantacaguiri matsiguenga Naro pënabintërine. Ira quemisanquinane përosati intiomoqueri Pabati Tosorintsi

cara Jonogaguitequë. Aro inganinaiguë pitirooti ira comantëgotënane aisati ira quemisantacaguirine matsiguenga. ³⁷ Aisonori cara ocanti nibarintsi: “Ira panguitatsi quero iriro águiro. Basiniati águërone”. Ipanguitiro poro matsiguenga oguitso iroonti Irinibare Tosorintsi, carari basini obiguitërone cara inguemisantacaguirine matsiguenga. ³⁸ Nigátaiguimi obiro pobiguitaiguero ora ipanguitë basini. Aisa icanta icomantëgotëna basini. Yamai pogometaiguero obiro matsiguenga arota inguemisantina.

³⁹ Iquemisantaigabaqueri arosonori Samari-asati Ira Jesus aroquenta ocomantëgotëri tsinane cara ocanque: “Icomantënaró antagaisati ora nacantaguëti”. ⁴⁰ Iroro icantobitaiguëri Samari-asati Ira Jesus icanqueri:

—Pintiomotaiganaquina yaca.

Aro itimanë Jesus pite cataguiteri. ⁴¹ Aro iquemisantaiguëri tojai basini Samariasati aroquenta iquemaigabaqueri Irinenisonori Jesus. ⁴² Icantaiguëro ora tsinane:

—Pinibatëgotëri Jesus obiro carari te najitimi. Yamai naquemisantaiguero aroquenta naquemaigabaqueri Irineniati Iriro. Nigóiguëri Iriro agabisaicotaiguërine omagaro matsiguenga.

⁴³ Cara pabisanaque pite cataguiteri yogaganaca Jesus irooti cara Garireaquë. ⁴⁴ Irineniati cantëgotënguicha Jesus teni iraniacaninataiguero comantantatsiri imatsiguenga. ⁴⁵ Cara yaretanaca Jesus Garireaquë, yágaigabaqueri

caninasati aroquenta iniaiguëri Garireasati canta Jerosarénquë cara itasonganti Jesus.

Jesos yoguibegajiri itomi iromeraro itingomi.

⁴⁶ Aisati yarepaa Jesus cara poeboroquë jítacha Caná cara jirai ípiaquero nija obaa. Ainta iromeraro itingomi ipaniaca Caperinaoquë. Aro íjanaitë itomi. ⁴⁷ Cara íquemocotobairi Jesus iromeraro itingomi cara ipaniaa Jesus cara Joreaquë irooti Garireaquë, aro íatásiqueri Jesus Canáque, yamanocopëri:

—Popogopë nobangoquë pigaguibegajinari notomi. Pënibaque ingamaque.

⁴⁸ Icabëri Jesus:

—Queroca nitasongantaguëti, quero piquemisantaiguina.

⁴⁹ Yamanocopëri iromeraro itingomi icampëri:

—Natingomi, panonganëma omanaque icami najaniquite.

⁵⁰ Yotabitanëri Jesus:

—Popiganajima pobangoquë. Aroque ibeganaa pitomi.

Íquemisanquero sërari ora ícanqueri Jesus, aro ípiganaja. ⁵¹ Cara yanonganaa pënibaque iraretajimaro íbango itonguibotaigacari iromeraro ícomantobëri:

—Ira pitomi tegotsitanai.

⁵² Yosamitobëri ati ocanta yaropei que. Yotabitanëri:

—Chopi aroque íparique paba pabisanaqueri janatigantsi.

⁵³ Yamai ígóque íriri cara íbegaja itomi chopi cara ícanqueri Jesus: “Aroque íbeganaa pitomi”.

Aito cara iquemisantaiguëri Jesus iriro aisati omagaro imatsiguenga.

⁵⁴ Ainta Jesus itimaji Garireaquë, ipaniaa cara Joreaquë. Ocarati yamai pite cara itasonganque Jesus cara yarepaa Garireaquë.

5

Jesus yoguibegajiri janaitatsiri cara ogaarequë.

¹ Aique omoncaraca basini cataguiteri cara yapatotaigaa joríojegui, cara itonganaji Jesus aisati Jerosarénquë. ² Cara Jerosarénquë pinasegui ogaare aitioniati omoro cara iquenacaguiiri oisha. Irinibarequë jorío ojita Betesita aiti pabocorooti pongotsi. ³ Cara pongotsiquë ainta inariaiga tojai janaitaguetatsiri, comarajari, carancara, emëngari, omagaro. Yoguiaque cara irosebaaquero nija ⁴ ironomire Tosorintsi. Cara yaguëpë irosebaaquero nija, aique pairiraca obaquënguïtsine ingaatë irobegajima pairoraca ojita ora óguëri. ⁵ Ainta inasegui sërari ijanaitë tojaisonori osarini ocarati 38. ⁶ Inariaca irisomamintoquë. Iniopëri Jesus igópëri ijanaitë cosamani. Yosamitapëri:

—¿Pininti pobegajima?

⁷ Yotabitobëri janaitatsiri:

—Nomatsiguenga, teni irine pairiraca cajaanane cara osebaatanëma nija. Iroontita najáque nara irobaquina basini ingaatë.

⁸ Aro igáqueri Jesus:

—Pingabiritima págairo pisamamento panëitanae.

⁹ Aito ca ibeganaa. Yáganairo irisomaminto, yanëitanai.

Iguisëgotaro jorío sábaro.

Ibeganaa sábaroquë. ¹⁰ Iroro icantaguëqueri joríopague ira sërari janaitabitacha icanqueri:

—Yamai iroonti sábaro. Teni ongomeite páganëro pisamamento. Jiraisonori isanguenaque Moisés ora quero atarobacaantaro eiro cataguiteri quë sábaro iroronta comagoriantague.

¹¹ Yotabitanëri sërari:

—Ira aguibegajina igáquina: “Págairo pisamamento panëitanae”.

¹² Yosamitaiguëri jorío:

—¿Pairo ijita ira agáquimi: “Págairo pisamamento panëitanae”?

¹³ Te irogóte pairiraca aguibegajiri aroquenta ipeganaca Jesus cara matsiguengajeguiquë.

¹⁴ Aique iniajiri Jesus oguibequë pongotsi irasi Tosorintsi icanqueri:

—Pinetse. Aroque pibeganaa. Quero pintague-taji aisati ora te onganinate arota quero pitsipirijaji agabenisonori.

¹⁵ Ipiganaja iriro cara joríojeguiquë icomantaiguëri cara yoguibegajiri Jesus. ¹⁶ Iroro igu-

isanijintaguëqueri jorío Ira Jesus aroquenta ita-songanque sábaroquë ora cataguiteri comagoriantague. ¹⁷ Carari icanqueri Jesus:

—Pabati Tosorintsi përosati icantiro ora caninari irooti yamai. Aisati nacantari Iriri nacantiro ora caninari. ¿Pairo nojocobiquero cara sábaroquë?

¹⁸ Aroquenta Jesus icanque cara Iriri Iriri Tosorintsi cara aisati icantari Tosorintsi, aisatinta

itarobacaati Jesus sábaroquë, icogasanotaigabitaca jorío iróguirime Jesus.

Cara igáanti Itomi Tosorintsi.

¹⁹ Icanque Jesus:

—Nangantasantëmini Naro Itomi Tosorintsi teni nangantasitima Naro pairoraca. Iroonti nanganque ora icanti Pabati. Ora omagaro icanti Iriro, aisati nanganquero Naronta Itomi. ²⁰ Inintasanotina Pabati Naronta Itomi. Yoniaguinaro antagaisati ora icanti Iriro. Aisati ironijaguina basini tojai arota pinguenganeintasantaiganaquima. ²¹ Cara icabiriqueri yoganiatairi Pabati ira camënguitsi, aisa nacantari Naro naganiatairi pairiraca ira naninti. ²² Yamai Pabati teni ingomantëgotaguetiri matsiguenga ora inganque. Ipënaró Naro cara nogóontaiguëmari antagaisati matsiguenga nongomantëgotëri pairoraca ingantaiguë aisati negaraca iriáiguë. ²³ Icanquero Pabati negaca arota omagaro iraniacaninatina caninarina Naronta Itomi aisati icanta iniacaninatiri Pabati. Ira te iraniacaninatina Naro Itomi, teatisati iraniacaninatiri Pabati Ira agáquina. ²⁴ Nangantasantaiguëmini ora aisonori ira quemobërone nasi nanibare aisati inguemisanqueri Pabati Tosorintsi Ira agáquina, përosati intiomoqueri Tosorintsi cara Jonogaguitequë. Quero icasitígatiri Pabati. Jirai iáigabitaca aiquero Sharincabeniquë, carari yamai iriáigae cara Jonogaguitequë. ²⁵ Nangantasantaiguëmini aroque omoncaraca cataguiteri cara iraegui jätënguitsineme aiquero Sharincabeniquë yamai cara inguemobëro

nanibare aro nantimacaguiiri Naronta Itomi Tosorintsi, iriáiguë cara Jonogaguitequë. ²⁶ Aisati nacantari ibega Pabati catimameri aisati timacagantatsiri, Iriro pênaro natimanë Naati aisati nantimacaguiiri matsiguenga Naronta Itomi Tosorintsi. ²⁷ Aisati itingomiquina ipênaro cara nongomantëgotaguëri matsiguengajegui ora inganque aronta nopaniaca Jonogaguitequë cara nomatsiguengatasantapë cara niboguë. ²⁸ Quero piquenganeintasanota cara orequima cataguiteri cara antagaisati igamagaegui inguemobëro nasi nanibare, ²⁹ aro ingabiritanaima inganiatanae irisotocanë imoropaguequë, ira cantaguetiro caninaro përosati intiomoqueri Tosorintsi Jonogaguitequë. Irari cantaguetiro ora te onganinate nongomantëgotëri antagaisati cara iriáguë Sharincabeniquë. ³⁰ Teni nangantasitima pairoraca ora nocogui Naro. Iroonti ora inganquina Tosorintsi nongomantëgotaguëri matsiguenga. Patiro nanganque ora icogui Ira agáquina.

Iraegui comantëgotëri Jesus.

Perosa icanqueri jorío Jesus:

³¹ —Aroca Naati comantëgotënguichane, aro pingantocoquina Naro notsoigani. ³² Ainta basini comantëgotëna. Nigóque ora icomantëgotëna iroonti aisonori. ³³ Cani posamitagantëri obirojegui ira Joan; ora icomantaiguëmi iroo aisonori. ³⁴ Carari Naanti Itomi Tosorintsi; jemita ora ingomantëgotëna matsiguenga. Patiro nacanquimiro arota iragabisaicotaigaimi Tosorintsi. ³⁵ Joan aisati icantaro pibega

obotagantsi cara posangueguitetasanoti. Arosata
 cataguiteri picaninatomotaiguëri obirojegui.
³⁶ Irinibare Joan ogótacagaiguëmi cara Naro Itomi
 Tosorintsi. Aisati ogótasantaguimi ora nacanque
 Naro cara nitasangobentiri matsiguenga cara
 igáquina Pabati. Patiro nanganque ora igáque
 Iriro. ³⁷ Aisati Ira agáquina icomantëgotëna
 carari te pinguemaigabaquero Irinibare
 teatisati piniaiguëri atiraca icanta Iriro.
³⁸ Teni pinguemisantaiguero obiro Irinibare
 Tosorintsi tenta pinguemisantaiguena Naro
 cara igáquina Iriro. ³⁹ Pinibatasantaiguero
 caninasati ora Sanguenari pijiquenta obirojegui
 ontimacaquemi përosati jonoquë, carari
 Naanti ocomantëgoti. ⁴⁰ Teni pinintaigue
 pabentina Naro pinguemisantina cara pin-
 tiomotaiguëri Tosorintsi përosati Jonogaguitequë.
⁴¹ Teni nongogue piniacaninatasitaiguena
⁴² nigóiguëmintá obirojegui teni pinintaiguëri
 Tosorintsi. ⁴³ Nipoque igáquenanta Pabati,
 carari te pinguemisantaigabaquina. Carari
 iribocasitimaca ira matobiantatsi, irianti
 pinguemisantaigabaque. ⁴⁴ Teni pinguemisan-
 tobinte obirojegui; iroontinta picogaigui
 piniacaninatobaguima obirojegui matsiguenga.
 Teni pingogaigue iraniacaninatimi Tosorintsi.
⁴⁵ Quero pijitina Naro comantëgotëmine
 Pabatiquë. Pijitabeca piquemisanqueri Moisés
 carari iriati Moisés comantëgotaiguëmine.
⁴⁶ Arome pinguemisanqueri Moisés, aisati
 pinguemisantaiguename Naro Naronta
 isanguenatocoque Moisés. ⁴⁷ Carari teca

pinguemisantaiguero isanguenare Moisés,
¿Atiroco onganquima pinguemisantaiguëro nasi
nanibare?

6

Jesos ipaiguëri iraperi sërari icarati 5,000.

(Mt 14.13-23; Mr 6.30-46; Ir 9.10-17)

¹ Itonquero irinibare Jesus cara Jerosarénquë,
aique iátaji cara Garireaquë. Imontianaca
angaare jitacha Garirea aisati ojita Tiberias.

² Yoguiataiguëri tojaisonorì matsiguenga
iniaiguërinta Jesus cara itasongobenqueri
janaitatsiri.

³⁻⁴ Cara pënibaque orequima
catagüteripague ora jitacha Pásicoa cara
irapatotaiguëma joríojegui, itongaiganaque
oguitojaquë Jesus aisati irogomere isobicaigapë.

⁵ Iniaigabaqueri Jesus arosonorì matsiguenga
yoguiataigapëri. Icanqueri ira Jeripe:

—¿Nega omanantëneri pan ora irapaiguë?

⁶ Icanque Jesus negaca arota iraniantëmari
Jeripe. Aroque igóque Jesus ora inganque Iriro.

⁷ Yotabitanëri Jeripe:

—Aroca omanantë pan ora pënatacha 200
tenario, quero cotonguiboro cara irapaiguë
omagaro arosata.

Panìro tenario yágui ira tarobacaatatsi poro
catagüteri. ⁸ Poro irogomere Jesus ijita Antiris
ireinti Simón Peroro icanqueri:

⁹ —Ainta yaca janequi sërari yamapë paboco-
rooti pan aisati pite itiomijani sima, carari quero
cotonguiboro tojainta matsiguenga.

¹⁰ Igáqueri irogomere Jesus icanque:

—Pigasobicaigueri.

Aiti pinasegui caninaro tobarisi tojai. Isobicaiguë sërari cara tobarisiquë icarati 5,000.

¹¹ Yáguëro pan Jesus icarasiaqueri Tosorintsi, aro yotsatengaiguëri ira sobicaigatsi. Aisati ipaguetaiguëri sima. Ora ocarati icogaigui matsiguenga. ¹² Cara iquemaigaca omagaro, icanqueri irogomere Jesus:

—Pobiitaguetajiro ora ingarataiguë, arota quero omainatëmata.

¹³ Aro yobiitaguetajiro iagajiro ocarataji 12 cantiri ora angaraquenguicha pan aroquenta iquemaigaca tojaisonoru matsiguenga. ¹⁴ Cara ini-aiguërinta matsiguenga Ira Jesus cara yomito-jaiguëro pan aisati sima itasorintsitequë, aro icanë:

—Aisonori Ica Iriro comantantatsiri Ira boquënguistsine yaca quibatsica Ira oguiaiguë cosamani.

¹⁵ Igóque Jesus cara icogaiguë matsiguenga iráganëri inganqueri itingomi. Aro itonganaque Jesus aisati, iáque casiriconiati.

Ipigapaa Jesus Caperinaoquë, yanëiatanë nija jonoicanti.

(Mt 14.24-33; Mr 6.47-52)

¹⁶ Cara ochapinitanë yanongaiganaca irogomere Jesus yagaitanë angaarequë.

¹⁷ Yotetaiganaca pitotsiquë iátocoiguë aiqero cara antatinta Caperinaoquë. Aroque otsitiniq. Teraiquerai iraretima Jesus. ¹⁸ Aro oparintanaca omotoncaatanë angaare sintsironta coguentima.

¹⁹ Icomataiganaque pabocorooti quirómetoro cara iniaigabaqueri Jesus yanëiapëro angaare

jonoicanti. Itsorogaiganaque irogomere.

²⁰ Icampëri Jesus:

—Naanti. Quero pitsorogaigui.

²¹ Aique icaninataiganaque yotetaigabajiri Jesus pitotsiquë. Aiguito iniaigaa canta onamijaquë canta iriátëri.

Icogaiquëri matsiguenga Ira Jesus.

²² Itimaiguë matsiguengajegui cara yapaiguë pan. Oquëtaguetanë igóiguë teni ine pitotsi. Patiro ora yotetaiganaca irogomere Jesus iátocoiguë, carari Jesus te intsibatanaimari.

²³ Paretaiga basini pitotsipague opaniaca Tiberiaquë aronisati cara yapaiguëro pan matsiguenga cara icarasiabintëro Jesus. ²⁴ Cara igóiguë teni irinaje Jesus irorojeguiquë teatisati irogomere, yotetaiganaca pitotsipaguequë irooti Caperinaoquë cara ingogaigairi Jesus.

Jesus ijica perintsi timagantatsiri.

²⁵ Cara iniaigairi antatinta, yosamitapairi:

—Ogometinari, ¿Ati ocanta pipoque yaca?

²⁶ Yotabitanëri Jesus icantaiguëri:

—Nangantasantëmini nigóiguëmi teni pingogaiguena cara nitasonganti, carari picogaiguina aroquenta papaiguëro poperi piquemaigaca. ²⁷ Quero picoguiro perintsi ora peganënguichane, ora pingogue perintsi timagantatsiri ontimacaguimi Jonogaguitequë përosati ora nomëmira Naronta matsiguengatapënguitsi. Ipënaró Pabati Tosorintsi cara nomaiguëmiro irorota timaquimine obirojegui pisërequë.

²⁸ Yosamitaiguëri:

—¿Pairo nangantaiguë ora ininti Tosorintsi?

²⁹ Yotabitanëri Jesus:

—Icoguini Tosorintsi pinguemisantina Naro Irironta agáquina.

³⁰ Aique yosamitaigairi:

—¿Yamai paio pitasonguë aisati arota naniobëro nanguemisantimi? ¿Paio pinti?

³¹ Omatsiguenga jirai yapaiguëro iraperi ora jitacha maná cara tera ontimengani. Ocantocoquero Sanguenari:

Ipaiguëri Tosorintsi perintsi paniacha jonoquë.

³² Icantaiguëri Jesus:

Nangantasantëmini, teni iriro paiguemirone Moisés ora perintsi paniacha jonoquë, carari yamai imauguëmi Pabati perintsi irorosonori paniënguichane jonoquë.

³³ Ora perintsi imauguëmi Tosorintsi yamai, Irianti sërari Ira masobingopënguitsi cara Jonogaguitequë. Itimacaqueri matsiguenga yaca quibatsiquë.

³⁴ Icantaiguëri matsiguenga Ira Jesus:

—Natingomi, përosati pomëntaiguenaro perintsi ora picantocoque.

³⁵ Icanqueri Jesus:

—Naro perintsi timagantatsiri. Cara popë poperi, caraquenta pitasegae aisati. Cara póga nija, caraquenta pomiretae. Carari cara pinguemisantaiguënanica, pinganinasëretanë përosati. Pinguemasëretaiquëmaro ora perintsi paniacha Jonogaguitequë. Naanti cantaca perintsi paniacha jonoquë.

³⁶ Pinaiguëna obirojegui carari aroque nacanquemi teni pinguemisantina.

³⁷ Antagaisati matsiguenga ira ipina Pabati iribocasitapëna Naro.

Pairiraca bocasitapënane coshoni noguëmari quero nojocajiri sotoquë. ³⁸ Nopaniacanta Jonogaguitequë nanganque ora ininque Ira agáquina. Teni nangante ora nocogui Naro. ³⁹ Ira agáquina ininti quero nobeguëmatiri paniro ira ipëna, carari nangábintsasantëri irooti cara nopocaje naganiatairi najátacaqueri jonoquë. ⁴⁰ Ininti Pabati Ira agáquina antagaisati niaiguënane quemisantaiguënane Naro matsiguengatapënguïtsi, përosati intiomoqueri Tosorintsi Jonogaguitequë. Cara nopigaima nangabiriqueri náganëri jonoquë.

⁴¹ Yabentaigaca joríojegui aroquenta icanque Jesus: “Naro yamai perintsi paniacha Jonogaguitequë”. ⁴² Icantobaca jorío:

—¿Cagarico Jesus Ira itomi José? Nigótiri iriri aisati iniro. ¿Pairo icantobique yamai: “Nopaniaca Jonogaguitequë”?

⁴³ Icantaguëri Jesus:

—Quero pabentaiga. ⁴⁴ Quero ipocasitina matsiguenga iriati queroca Iriro agátinarine Pabati Ira agáquina Naro. Aisati nangabiritajiri naganiatairi cara nopocaje aiquenta. ⁴⁵ Isanguenataiguë comantantsiripague jirai:

Irogometaguëri Tosorintsi omagaro matsiguenga.

Antagaisati ira quemisanquerine Pabati ora yogomequeri iribocasitapëna Naro. ⁴⁶ Te pairi neirine Pabati. Paniro Naro aronta nopaniaca Iriroquë. ⁴⁷ Nangantasantëmini pairiraca quemisanquinane nantimacaqueri cara intiomoqueri Tosorintsi Jonogaguitequë.

48 —Naro perintsi timagantatsiri. 49 Jirai pomatsiguenga yapaiquëro perintsi jitacha maná cara tera ontimengani. Carari icamaiguë antagaisati. 50 Oca perintsi ninibatëgotica opaniaca jonoquë, aroca irapëro matsiguenga quero icamaji. 51 Naro perintsi timagantatsiri. Nopaniaca jonoquë aroca irapëro oca perintsica pairiraca matsiguenga intimacaqueri Pabati Tosorintsi përosati. Oca perintsi nomërica iroonti nasi nobatsa. Nomaiguëri matsiguenga arota intimacaganëri iriro përosati.

52 Aique yosamitobaca jorío icanque:

—¿Atiroco ingantima Iriro cara imacáiro ibatsa ajaguëri?

53 Icanqueri Jesus:

—Aisonori nangantasantëmini nomatsiguen-gatapë. Queroca paaguiro nobatsa querootisatica pógaro naraa, quero pitimi Tosorintsiquë tenta pigótiri. 54 Ira jaguërone nobatsa aisati óguëmarone naraa aro intimacaqueri Tosorintsi Jonogaguitequë përosati. Aisati nangabiritajiri naganiatairi cara nopocaje. 55 Nobatsa iroronta perintsisonori aisati naraa iroronta omiretagantsisonori. 56 Ira jaguërone nobatsa aisati óguëmarone naraa inguengasëretina, aro intiomoquina jonoquë. Coshoni iroquina Naro aisati coshoni noguëri iriro. 57 Ira agáquina Pabati Irironta timagantatsi. Naro përosati natiomotiri. Aisa icanta ira jaguënane nantimacaqueri. 58 Ninibatëgotiro perintsi opaniaca jonoquë. Teni aisati ongantimaro pibega perintsi ora yapaiquë pomatsiguenga jiraisisonori jitacha maná. Icamaiquë iriro. Carari ira përone oca

perintsica ninibatëgotica përosati intimaque Jonogaguitequë.

⁵⁹ Antagaisati oca yogomeantëca Jesus inibatëro cara yapatotaiga jorío cara poeboroquë jitacha Caparinao.

Cara intime përosati matsiguenga.

⁶⁰ Aroqueque yogomeantë Jesus, ainta ira aguiatëri icantobaca:

—Comëtaro oca nibarintsica. ¿Pairi quemobërone?

⁶¹ Igóque Jesus cara yabentaigacaro icomëtaigabacaro irinibare, yosamitëri:

—¿Teco ongomeitomotimi oca? ⁶² ¿Ati pingantaiganaque aroca piniagabaquina nagainocanaima cara nopaniaca jirai? ⁶³ Itimaque matsiguenga aitinta isëre. Queroca pini isëre irianti igamaga. Oca nibarintsica ninibatimica ontimacaquemi përosati jonoquë; cara pinguemisantobëro, Isëre Tosorintsi ontimacaquemi. ⁶⁴ Përosati ainta obirojeguiquë ira te inguemisantina.

Cara jiraisonori cara irirai parintënguicha igóitacari Jesus ira te inguemisantiri aisati ira ágagantërine. ⁶⁵ Aisati icanque Jesus:

—Iroero nacantaguëtaiguëmi quero ipocasitina matsiguenga irianti. Patiro iromapënarica Pabati iribocasitapëna.

⁶⁶ Tojai ira aguiataigabitari Jesus aique ijocaiganajiri, te intsibataimari aisati. ⁶⁷ Aro yosamitaiguëri Jesus ira irogomere icarati 12:

—¿Aisatico picogaigui obiro pijáigae?

⁶⁸ Yotabitanëri Simón Peroro icanqueri:

—Natingomi, teni irinaje basini ira naguiataigae. Patiro pasi pinibare ontimacagaiguëna përosati. ⁶⁹ Obiro naquemisantaiguë aisati nigóiguimi Obiro caninarisonori Itomi Tosorintsi catimanagerisonori.

⁷⁰ Yotabitanëri Jesus:

—Nocoigaiguëmi obiro picarati 12, carari ainta poro obirojeguiquë iromeraro Satanás camagari.

⁷¹ Jesus inibatëgotëri Joras Cariotisati ira ágagantërine Ira Jesus cara matsiguengaquë catsimari.

7

Ira ireintiegui Jesus te inguemisantaiguëri.

¹ Aique iátagueque Jesus Garireaquë tenta iraninte iriáte Joreaquë icogaiguininta joríojegui iróqueri canta. ² Pënibaque orequima basini cataguiteri cara irapatotaiguëma joríojegui. Iquengaiguero jorío cara jiraisonori isotocaigai Ejípitoquë cara itimaiguë ibangonaeguiquë.

³ Ipocasipëri ireinti Jesus icampëri:

—Pijáte canta Joreaquë arota iraniaiguëmi pogomere cara pitasonganque canta. ⁴ Pinintica irogóiguëmi matsiguenga quero pitasonganti comanoroni. Poniagaiguëmari omagaro matsiguenga.

⁵ Icanqueri negaca ireinti tenta inguemisan-tirini Iriro. ⁶ Icantaiguëri Jesus:

—Teraí oretima cataguiteri cara najáque Naro Joreaquë. Obirojegui pijátasiquima basinipague cataguiteri ocaninatomotiminta. ⁷ Quero iguisanijintaiguimi obiro matsiguenga, carari Naanti iguisanijintaiguëri Naronta ogótacagaiguëri

ora icantaguetei te ongomeite. ⁸ Pijáigue obirojegui Jerosarénquë. Queroquerai niáti Naro terainta omoncaratima cataguiteri cara najáque.

⁹ Aroque icanque negaca, përo cara inë Jesus Garireaquë.

¹⁰ Cara iáiguë ireinti Jesus cara Jerosarénquë, aique iátaji Iriro comanoroni carari te ironi-jaguimari matsiguenga. ¹¹ Cara Jerosarénquë ico-gaigabitacari Jesus jorío, icantobaca:

—¿Atique? ¿Negaraco iquenaque?

¹² Tojai matsiguenga inibatëgotaguiri Jesus. Ainta cantënguisti:

—Iriro caninari.

Ainta basini cantënguisti:

—Teni ingomeite. Yamatobiqueri matsiguenga.

¹³ Tojai inibatëgotëri carari te irinibate catin-gasatiquë ipingaiguërininta itingomipague jorío.

Iátaji Jesus cara Jerosarénquë cara yapatotaiga joríojegui.

¹⁴ Aroque yapatotaigaca jorío cara Jerosarénquë aronibati cataguiteri cara otsonganaquima jiesita. Aro itonganaque Jesus icanaque oquibequë pongotsi irasi Tosorintsi, yogomeantapë. ¹⁵ Iquenganeintaiganaca jorío, icantaiguë:

—¿Negaraco igóque tojai Ica tenta irisanguen-natasanteni?

¹⁶ Yotabitaiganaqueri Jesus:

—Teni nogomeantasitimaro Naro. Patirontiatu nogomeantiro ora icanquina Ira agáquina.

¹⁷ Pairiraca nintatsi ingante ora icocaqueri Tosorintsi irogóquero nogomeantane negaraca

opaniaca, irasi Tosorintsi iroontico nasiati.
¹⁸ Ira nibatocotacha iriati iroro ininti iraniacaninataguimari matsiguenga, irari nibatatsi aisonori patiro ininti iraniacaninatiri matsiguenga Ira agátiri. Ira nibatatsi negaca iriro caninari. Te intoiguëma. ¹⁹ Ipëmiro Moisés ora iragáantane Tosorintsi. ¿Aisonorico? Carari te poro quemisantirone obirojeguiquë. ¿Pairo picogobique pógaiгуena Naro?

²⁰ Yotabitaiganaqueri joríojegui:

—Teni pineicotajima. Inanquimini camagari. Teni pairi nintatsine iróguimi.

²¹ Icanqueri Jesus:

—Patiro cara nitasonganque sábaroquë irooti piquenganeintasantanaca.
²²⁻²³ Yogometaiгуëmi Moisés ora pameta pitoitiri pitomijegui. Yogomeantiro Moisés ora icanque omatsiguenga jiraisonori. Cara sábaroquë pitoitëri pitomi arota pomoncaratiro irogomeantane Moisés, ¿Pairo piguisaneintobitaiguina Naro aroquenta noguibegasantëri janaitatsiri cara sábaroquë? ²⁴ Quero pinibatëgotiri matsiguenga ora conijatasitacha. Querootisati picomantëgotasitari queroca pigótasantiri.

Inibatëgotaca Jesus nega ipaniaca.

²⁵ Ainta Jerosaresati icantobaca:

—¿Iriroco Ira icogaigui iróguiri? ²⁶ ¡Pinetseri! Yogometaiгуiri antagaisati matsiguenga carari te ingantaigueri pairoraca natingomipague. ¿Aisonorico igóguiri Iriro Quirisito Ira agabisaicoontatsi? ²⁷ Carari nigóguiri Ica

negaraca ipaniaca. Cara iribocapë Quirisito quero pairi ogótiri negaraca imaniëma.

²⁸ Cara oquibequë pongotsi irasi Tosorintsi cara yogomeantasegui Jesus. Yotabitanëri catsigue:

—Pijitaigabitaca pigóiguina Naro, aisati piji-taigabitaca pigóiguë negaraca nopaniaca. Carari te nopocasitima. Nipoque igáquinanta Ira aisonori. Teni pigóiguëri obiro. ²⁹ Naro nigótiri aronta nopaniaca cara Iriroquë. Aisati Irironta agáquina.

³⁰ Icogaigabitaca iráquerime carari te pairi águirine terainta omoncaratima cataguiteri cara irágaiguëri.

Pënibaque iriátë Jesus.

³¹ Ainta tojai quemisantaiguëri icanque:

—Cara iriboquë Quirisito, ¿Aroco irobapëri Ica sërarica cara itasonganti?

³² Igóiguë bariseo cara inibatëgotëri matsiguenga Ira Jesus. Iriro aisa itingomi saseriroti agátaiguëri ira omisantiro oquibe pongotsi cara iráqueri Jesus. Yarepari. ³³ Icabëri Jesus:

—Arosataanti cataguiteri ninë obiroquë. Aique najátaje cara agáquinariquë. ³⁴ Pingogabetaigaina quero piniajina, queronta piáigui cara ninë.

³⁵ Aique iparintaca yosamitobaca jorío:

—¿Atiroco iriátë Ica cara quero aniajiri? ¿Caraco iriátë cara iátagueque jorío jirai iguebatsitequë ira cagari jorío? ¿Cara irogometaiguëri ira cagari jorío? ³⁶ ¿Pairo ocanti irinibare cara icanque: “Pingogabetaigaina quero piniajina, queronta piáigui cara ninë”?

Inibatëgotiro Jesus nija timagantatsiri.

³⁷ Cara cataguitariquë carantatsiri cara yapatotaiga jorío, iroonti cataguitariquë caninaro, icaimanë Jesos icanë catsigue:

—Aintaca paniro imiretasantë isërequë, iribocasitapënata nomëri ora icogui. ³⁸ Cara ocanti Sanguenari, pairiraca quemisanquerine Quirisito, cara iraneingomentoquë ocontiatanëri nija timagantatsiri.

³⁹ Jesos yosiacagantacaro nija iroonti icomantëgotëro Caninaro Isëre Tosorintsi inantasëretëmari antagaisati ira quemisanqueri Quirisito. Terai oguëpe Isëre Caninaro terainta iragainocanaima Jesos Jonogaguitequë.

Icantobagobicari Jesos.

⁴⁰ Ainta inasegui matsiguenga cara iquemobëro irinibare Jesos icanque:

Aisonori Ica sërarica Iriro comantantatsiri Ira isanguenatocoque Moisés jiraisonori Ira boquënguitsine.

⁴¹ Ainta basini icanque:

—Iriro Quirisitosonori.

Ainta basini cantënguitsi:

—¿Atiroco imaniëma Garireaquë Quirisito?

⁴² Ocanti Sanguenari Quirisito imatsiguenga David itingomi jorío jiraisonori. Aisati ocanti imaniëma Berënuquë iboeborotequë David.

⁴³ Aro ira matsiguenga icasiriconiatibiritaiganacari Jesos. ⁴⁴ Ainta icogaigabitaca iráguirime, carari te pairi cantirine. ⁴⁵ Ira omisantiro oquibe pongotsi ipigasiiganaja

cara agátiririquë, ira bariseo aisati saseriroti. Yosamitaigabajiri bariseo:

—¿Pairo te pomabiripëri?

⁴⁶ Yotabitanëri ira omisantiro pongotsi:

—Teni irine sërari nibatatsi ibega Iriro.

⁴⁷ Yosamitairi bariseo:

—¿Aisatico obirojegui yamatobitaiguëmi?

⁴⁸ ¿Iquemisanquerico itingomi jorío, aisati iquemisanquerico bariseo? Teni. ⁴⁹ Carari icaegui matsiguengaca te irogótiro ora isanguenaque Moisés yamai ingasítigatëri Tosorintsi.

⁵⁰ Ainta Nicoremo ira bocasitëri Jesus jirai. Iri-anti bariseo. Icanqueri:

⁵¹ —Quero acasítigatiri pairiraca queroqueraica icomantëgota. Cara anguemaquerintata aroque ogóqueri pairoraca icanti, aro angasítigatëri. Intso-menta anguemirinta cara ocanti isanguenare Moisés.

⁵² Isintsitsaqueri:

—¿Aisatico obiro popaniaca Garireaquë? Pini-batasantiro Sanguenari arota pigóte te pairi comantantatsiri paniachane Garireaquë.

⁵³ Aique iátaguetaji panirootipague cara ibango-quë.

8

Ora tsinane antagueantatsiri.

¹ Carari aique iáque Jesus oguitojaquë jitacha Olibos. ² Oquëtaguetanë ipiganaja oquibequë pongotsi irasi Tosorintsi. Ipocasitaigapëri tojai matsiguenga. Isobiaque Jesus yogometaguëri. ³ Aro ira bariseo aisati ira ogomeantiro isanguenare Moisés yamaigapëro poro tsinane ora aguimintari ojime. Yamaigapëro yoguëro aganguisatiquë, icampëri Ira Jesus:

4 —Ogometinari, oca tsinane naniaiguëro aique nágaiguëro paguimintasehari ojime. 5 Ora isanguenare Moisés pigátaiguina nobasegaiguëro ora tsinane cantacha negaca. ¿Ati picanti Obiro?

6 Icantaguë negaca cara iraniantimari Jesus arota ingantocotasitimari Iriro. Aro yoguitanaca Jesus isanguenabatsatanë quibatsiquë ibatsapacoquë. 7 Përosati yosamitapininqueri. Aro icabiritanaa Jesus icanqueri:

—Aintaca obirojeguiquë pairiraca te ingantaguete ora te onganinate, iritsita miongatëquerone obatatsi mopë.

8 Aisati yoguitanaa Jesus isanguenabatsatanai quibatsiquë. 9 Cara iquemobëro irinibare Jesus, aro antagaisati irirojegui igónijnca icantaguetironta ora te ongomeite. Isotocaiganaque bariseo porocague. Iritsita obaquenguitsi antiasiparipague aique isotocaiganaque ira basinipague. Irinibani Jesus, aisati tsinane aisati irogomerejegui. 10 Aique icabiritanaa Jesus yosamitëro:

—Tsinane, ¿Atini yamai ira comantëgotëmi? ¿Te pairi baseguimine?

11 Ocanque:

—Teni, Natingomi. Teni irinëmataje.

Icanquero Jesus:

—Querootisati nacasitígatimi Naro. Yamai pijátaje. Quero pogatsitairo ora te ongomeite.

Jesus iguëtaguiterite omagaro matsiguenga.

12 Aisati Jesus yogometajiri irogomere icanqueri:

—Naro osangueguitesëretocotasantaguetiri omagaro matsiguenga arota nogótacaguiri ora

icantagueti te onganinate. Aisati nacantaro pibega cataguiteri posangueguitetasanotiri iraneingomentoquë matsiguenga. Ira aguiatina quero yanëiti tsitiniriquë. Nosangueguitetocoqueri cara isërequë arota inguemisanquina intiomoquina Jonogaguetequë përosati.

¹³ Aique icantaiguëri bariseo:

—Picomantëgotaca Obiati. Notsoinguëmini. Teni pingantiro ora aisonori.

¹⁴ Yotabitanëri Jesus:

—Aroca nongomantëgotima Naati, nacantiro ora aisonori nigótinta Naro nega nopaniaca aisati nega najáque. Te pigóigue obiro negaraca nopaniaca teatisati pigóigue negaraca najáque.

¹⁵ Obirojegui cantëgoiguina terainta pigóiguero ora aisonori. Teni nangantocotiri pairiraca Naro.

¹⁶ Carari aroca nongomantëgotiri nanganquero ora aisonori quero nacantocotiri paniro Naro. Intsibatëna Pabati Irironta agáquina.

¹⁷ Isanguenarequë Moisés ocanti aroca pite sërari inguengaiguema cara ingomantëgotëri matsiguenga, pinguemisantiri. ¹⁸ Yamai nacantococa Naro aisati icantocotina Pabati Ira agáquina. Ainta pite.

¹⁹ Aique yosamitaiguëri:

—¿Nega ini Piri?

Yotabitanëri Jesus:

—Teni pigótina Naro, teatisati pigótiri Pabati. Aroca pigótiname Naro, arome pigóquero Pabati.

²⁰ Oca nibarintsica icanquero Jesus cara yogomeantasegui oquibequë pongotsi irasi Torosintsi cara yoguiri jorójegui quirequi. Te pairi

águirine terainta omoncaratima cataguiteri cara irágaiguëri.

“Quero piáti atiraca najáque Naro”.

²¹ Aisati icantajiri Jesus:

—Canta najáque Naro, pingogaigabitëna obiroyegui quero piniájina queronta piáti cara najátaje Naro. Pingamaque queroquerei pijoquiro ora picantagueti te onganinate. Quero popasiniatitaji.

²² Yosamitobaca joríojegui:

—¿Iragamaguëmanico cara icanque quero iáti eiro cara iriátë Iriri?

²³ Icantaguëri Jesus:

—Obiro timaigatsi yaca osobica. Naro paniacha jonoquë. Obiro paniacha quibatsica. Naro te nomaniema quibatsica. ²⁴ ¿Teco nongomantimi cara pingamaiguë queroquerei pijoquiro ora picantagueti te onganinate? Queroca piquemisantina Naro aro quero nojocajimiro ora picantagueti te onganinate, aro pijáiguë cara Sharincabeniquë.

²⁵ Yosamitaiguëri jorío:

—¿Pari pijita Obiro?

Icanqueri Jesus:

—Aroque nocomantëmi jirai. ²⁶ Aiti tojaiquerei nongomantëgotaguëmi. Igáquina Pabati Tosorintsi nongomantaguequeri matsiguenga ora icanque Pabati ora icanti aisonori.

²⁷ Te irogótaiguero jorío cara Jesus inibatëgotëri Tosorintsi Iriri.

²⁸ Iroero icanqueri Jesus:

—Cara popëicoquina corosiquë Naro matsiguengatapënguitsi, aro cara pigóiguëna Naro aisonori. Aisati pigóiguëna teni nangantasitima Naati. Iroonti nacanque ora icanti Pabati

²⁹ Irironta tsipatina Pabati. Te irioquina paniro përonta cara nacantiro ora ininti Iriro.

³⁰ Cara inibatë Jesus negaca, aro iquemisan-taiganaqueri tojai matsiguenga.

Itomijegui Tosorintsi aisa ira antaguetiro ora te onganinate.

³¹ Aique Jesus icantaiguëri jorío ira quemisan-queri:

—Aroca përosati pinguenguero pinguemisan-tiro nanibare, obiro nogomeresonori.

³² Aique pigótaigabaquero nasi nanibare iroonti irorosonori. Ongantacaquemi arota quero picantagueigui përosati ora te onganinate. Quero imerataimi Satanás quero icantacagajimiro ora quimingaro. Irojacobentajimiro Tosorintsi ora quimingaro.

³³ Yotabitaiganaqueri jorío:

—Naroegui imatsiguenga Abaram. Te pairi merataiguenane. ¿Pairo picantobique: “Quero imerataina Satanás”?

³⁴ Icantaiganaqueri Jesus ira jorío:

—Nangantasantëmini, antagaisati ira cantaguetiro ora te onganinate irianti iromeraro Satanás.

³⁵ Atiraca ongantima iraninte, ira meratari iromeraro irioquiri sotoquë, carari itomi casintaro pongotsi përosati irinaque. ³⁶ Iro aroca nomasiniatitanaimi Naro Itomi Tosorintsi, quero picantagueigui përosati ora quimingaro. Quero imerataimi Satanás. ³⁷ Nigóiguimi obiro imatsiguenga Abaram, carari piquengaiga pigamagaiguëna tenta pinguemisantobëro nanibare paneingomentoquë. ³⁸ Ninibati Naro

ora naneicoqueri Pabati. Picantaigui obirojegui ora icanti pasi piri, piquemaiguëri.

³⁹ Yotabitaiganaqueri jorío:

—Nasiati pabati Abaram.

Carari icanqueri Jesus:

—Obiroca imatsiguengasonori Abaram, pingantaiguero aisa ora icanti Abaram. ⁴⁰ Carari yamai picogaigui pigamagaiguëna cara nocomantaiguëmiro ora aisonori ora naquemaque Pabatiquë Tosorintsi. Abaram te ingantiro negaca.

⁴¹ Obirojegui picantaiguero irootisati ora icanti piri.

Aique icantaiganaque jorío:

—Naroegui teni ninasitima aisa picanta Obiro pinasita, carari ainta nasi Pabati Irianti Tosorintsi.

⁴² Icanë Jesus:

—Irirome piri Tosorintsi aisonori, pinintaiguename Naro, Naronta paniacha Tosorintsiquë. Teni nopocasitima, igáquinani Iriro. ⁴³ ¿Pairo te pinguemobitiro nanibare? Teni pinguemaiguero tenta pingogueni pinguemisantiro. ⁴⁴ Obirojegui irasi Satanás.

Iriro piri irianti camagari. Picogaigui pinganque ora icogui piri. Iriro ógueri cara jiraisonori. Te irinibatiro ora aisonori imaintirotinta. Itsoigani irasinta icanta. Omagaro tsoigagantsi paniacha Satanásiquë irironta tsoigagari matsiguenga.

⁴⁵ Obirojegui aisati picantari ibega iriro. Iroro te pinguemisantaguëtina ninibatironta ora aisonori. ⁴⁶ Obirojegui yamai ¿Pai cantënane aiti nacantagueti ora te ongomeite? Aroca ninibatëro ora aisonori, ¿Pairo te pinguemisantobitina?

⁴⁷ Ira paniacha Tosorintsiquë inguemisantobëro Irinibare Tosorintsi. Te pinguemobëro obirojegui cagarinta obiro iraisati Tosorintsi.

⁴⁸ Aique icantaiganaque jorío:

—¿Aisonorico ninibataiguë Obiro Samariasati aisati inanquimi camagari quimingari?

⁴⁹ Yotabitanëri Jesus:

—Teni irinantina camagari. Patirontiatu nacanqueri ira matsiguenga iraniacandinataiguëri Pabati, carari picantocotasitaguëta obirojegui ora te onganinate. ⁵⁰ Jemita iraniacandinataiguënata Naro matsiguenga. Irinibatocotinata Tosorintsi ora caninaro. Aisati ingomantëgotaguëmi Iriro obironta te pingomeitague. ⁵¹ Nangantasantëmini ora aisonori, ira quemisantiro ora nacanti Naro quero icami isërequë carari përosati intime jonoganta.

⁵² Icantaiganaque jorío:

—Yamai nigótasanoigui aisonori inanquimi camagari. Icamaguë Abaram aisati comantantatsirijegui. Carari picanque obiro: “Ira quemisantiro ora nacanti Naro quero icami”. ⁵³ ¿Obiroco obaqueri Abaram ira camënguëtsi? ¿Obiroco obaqueri aisati comantantatsiri iraegui camënguëtsi? ¿Obiroco Tosorintsi? ¿Pairiroco pijita Obiati?

⁵⁴ Yotabitanëri Jesus:

—Aroca nanibatëgotëma quero ocomeiti, carari Irianti Pabati inibatëgotinaro ora caninaro. Iriati picantaigabitaca pasi pitosorintsite. ⁵⁵ Teni pigóigueri. Naro nigótiri. Arome nanganquimi teni nogótiri Pabati aro Naro tsoenti pibegaiga obirojegui cara pitsoigaiga. Carari aisonori nigótiri naquemisantiro ora

icanti Tosorintsi. ⁵⁶ Abaram pomatsiguenga jiraisonori icaninatasanti cara igóque aiquenta nopoque Naro yaca quibatsica. Iquemisanquina icaninasëretë.

⁵⁷ Icantaiganaque jorío:

—Terai oretima 50 posarinite. ¿Pinaqueri Abaram jiraisonori?

⁵⁸ Yotabitanëri Jesus:

—Nangantasantëmini, cara teraiquerei irine Abaram, ainta ninëta Naro.

⁵⁹ Aito cara yágaiguëro jorío mopë cara iromion-gatëquerime Jesus, carari aroque imánanaca Irero cara matsiguengaquë, isotocanë oquibequë pongotsi irasi Tosorintsi iátaji.

9

Yogaguibegajiri Jesus ira sërari comarajatatsi cara iboguë.

¹ Cara yanëitë Jesus iniaqueri sërari comarajari irinaga icomarajati cara iboguë. ² Yosamitaiguëri Jesus irogomere:

—Ogometinari ¿Pairo icomarajabirique ica sërarica cara iboguë? ¿Icantaquetinico iriri ora te onganinate, oraco iniro, iriatico cantënguitsi ora te ongomeite? ¿Iroro ibogaguëtë comarajari?

³ Yotabitanëri Jesus:

—Icomarajatasita. Te ingantaguite ica ora te onganinate, teatisati iriri, teatisati iniro. Icomarajati arota ongonijate itasorintsite Tosorintsi. ⁴ Cara yobariaque paba intarobacaaque matsiguengajegui. Cara ontsitinitanë quero itarobacaati. Aisa nacantaiga narogui. Yamai natarobacaataigui cataguitëriquë.

Natarobacaatineri Ira agáquina. Aiquentata nangamaqueca quero natarobacaapai.
⁵ Iroontita ninasegui Naro yaca quibatsica, nosanguetitocotiri matsiguengajegui.

⁶ Cara itsonquero Jesus irinibare ijobaque quibatsiquë, yogaabatsaquero aro yáguë arosata yoguëneri iroquiquë comarajari. ⁷ Igáqueri:

—Yamai pijáte, pinguibaoguitima ogaarequë jitacha Siroé.

Siroé ocanti ogátaga. Aique iáque iquibaoguitaa aro ibeganaa, ipigapaa aroque iniaji. ⁸ Ira itimanamitanepague aisati ira niaiguëri jirai cara yamanopiantanti quirequi, icantocotaiguëri:

—¿Cagarico ini sobigatsi yamanopiantanti quirequi?

⁹ Ainta icanque:

—Iriro.

Ainta basini icanque:

—Cagari. Irianti irosiaguëri.

Icanë iriro:

—Naanti.

¹⁰ Yosamitaiguëri:

—¿Ati picantaja cara piniaji?

¹¹ Yotabitanëri ira comarajatabetacha:

—Ira jitacha Jesus yogaabatsaque quibatsi yoguinaro noroquiquë igáquina: “Pijáte Siroéquë pinguibaoguitaima”. Aro niáque naquibatanta aro nanianai.

¹² Yosamitaiguëri:

—¿Atini yamai ira niagaimi?

Icanque iriro:

—Taa. Teni naniajiri.

Yosamitaiguëri bariseo ira comarajatabetacha.

¹³ Yágaiganaqueri ira comarajatabetacha cara bariseoquë. ¹⁴ Aro iroonti cataguiteri sábaro Ira Jesus yogaabatsaque quibatsi ora yogaguibegantaari comarajari. ¹⁵ Aisati bariseo yosamitaigairi ati icantaja ca inianai. Icanqueri:

—Yoguënaró Jesus cajabatsari noroquiquë, aique naquibataa nanianai.

¹⁶ Ainta bariseo icanque:

—Ira aguibegajimi te aro imaniema Tosorintsiquë itarobacaaquenta sábaroquë.

Ainta basini bariseo icanque:

—¿Atiroco inganquima iritasongantagueque ira sërari cantaguetatsira te pojocajenga?

Aro icasiriconiatitaiganaque bariseo. ¹⁷ Aisati yosamitaigairi sërari comarajatabetacha:

—¿Pairo pingantocoqueri obiro yamai iniacagajiminta?

Icanque:

—Iriro comantantatsiri.

¹⁸ Irari joríojegui te iraninte inguemisantaigueri ira comarajatabetacha yamaica aroque inianai. Icaimagantaiguëri iriri aisa iniro.

¹⁹ Yosamitaigabaqueri:

—¿Iriro pitomi ica picantocoque cara iboguë comarajari? Ati icantaja iriro yamai cara inianai?

²⁰ Yotabitanëri iriri aisa iniro:

—Nigóiguiri ica notomica. Nigóqueri ca iboguë comarajari. ²¹ Carari atiraca icantaja yamai cara inianai teni nogóigue naro. Teatisati nogóigue pairiraca niagairi. Posamitaigueri iriro aroquenta iquibiaque cara ingomantëgotëma irineni.

²² Icanque iriri iniro negaca ipingaiguërinta jorío. Aroque icomantaguetaiguë jorío aroca

pairiraca cantëgotërine Jesus Iriro Quirisito, iri-
oquëri cara yapatoita jorío. Querootisati inin-
tacaguiri icai. ²³ Iroro icantaguëque iriri aisa iniro:
“Aroque iquibiaque. Posamitaigueri iriro”.

²⁴ Aisati icaimaigairi sërari comarajatabetacha
icanqueri:

—Pingantocotiri Tosorintsi caninarisonori.
Nigóiguiri ira sërarira ira aguibegajimi icantagueti
ora te ongomeite.

²⁵ Yotabitanëri iriro:

—Teni nogótiri iriroca cantaguetatsira. Patiro
nigóque jirai nocomarajatabeta yamai aroque na-
niaji.

²⁶ Aisati yosamitaigairi:

—¿Pairo icanquemi cara iniacagajimi?

²⁷ Icanque sërari:

—Aroque nocomantaiguëmi carari te pinin-
taigue pinguemina. ¿Pairo picogui basini non-
gomantëmi? ¿Obiroco nintatsi pingantaiguemari
irogomere aisati?

²⁸ Yamai iguisatsatëri jorío:

—Obiro irogomere Jesus. Naroegui irogomere
Moisés. ²⁹ Nigóiguiri Moisés inibatëri Tosorintsi.
Ica te nogóigueri negaraca ipaniaca.

³⁰ Yotabitaiganaqueri sërari:

—Naquenganeintasanotanëmi te pigóigue
atiraca ipaniaca Ira niagajina noroquiquë.

³¹ Nigóigui te inguemobëri Tosorintsi ira
cantaguetatsi te ongomeite, carari inguemobëri
ira quemisanquerine intoroganëri, aisati
inganquero ora icogui Tosorintsi. ³² Cara
oparintaca quibatsica irooti yamai te pairi
niaguirine ira ibogatsi comarajari. ³³ Aroca

ica sërarica te imaniema Tosorintsiquë, quero itasonganti.

³⁴ Iguisatsataiguëri bariseo:

—Teni pingomeite obiro. Picantaguetasanoti ora te ongomeite. Iro ro pibogaguëque comarajari. Pijáte. Querootisati picai cara napatotaiga naroe GUI jorío ibangoquë Tosorintsi.

Ira te inguemisantiri Jesoquisito icomarajati ni isërequë.

³⁵ Jesus iquemocoqueri sërari comarajatabetacha aroque ijocaiguëri jorío. Iniajiri yosamitëri:

—¿Piquemisantiri obiro Ira paniacha jonoquë matsiguengatapënguitsi?

Icanque sërari:

³⁶ —Ogometinari, ¿Pari ijita? Pingomantinari arota nanguemisantianëri naro.

³⁷ Icanqueri Jesus:

—Yamai aroque piniaqueri. Naromë nibat-acaguimica yamai.

³⁸ Aro ira sërari yobaticagueritotanaca icanëri:

—Natingomi, naquemisantimi.

³⁹ Aique icanque Jesus:

—Iro ro nipocasique yaca quibatsica nongomantëgotaguëri matsiguengajegui. Ira comarajasëretatsi tenta irogótiri Tosorintsi, iriro nogótacaqueri ingantajimari naniacagajiri ira comarajatabetachari. Carari ira jitabitacha igótiro omagaro ora aisonori, nobegopitairi ora igótabeca; inganquimari ibega comarajasëretatsiri.

⁴⁰ Ainta bariseo inasegui iquemobëro oca nibarintsica yosamitaiguëri:

—¿Atiroco nacantaiga naro? ¿Nocomarajasëretaiguinico?

⁴¹ Yotabitanëri Jesus:

—Arome pingomarajasëretaigne, querooti-satime pini ora picantaguete te onganinate. Carari yamai pijitabetaiga pigóiguero ora aisonori. Iroro iniaiguëmi Tosorintsi picantaguetasanotomotaiguiri ora te ongomeite.

10

Jesus caninari omisantantatsiri.

¹ Përosati yogomeanti Jesus:

—Nangantasantëmini ora aisonori, ira quero iqui omoroquë cara itantota oisha irianti cosirinti, caraantinta iratanë jonoquë tantotsi. ² Irari catsi omoroquë irianti omisantaiguiri iroishate. ³ Ira omisantiro sitëcori irasirigotobëtiguiri ira omisantantatsiri. Aisati inguemaibagaqueri oisha irironta casintari cara ingaimantaigapëmari iripajiroquë, iraguiataiganaqueri sotoquë igótironta ora irinibare ira omisantirira. ⁴ Cara iromisotocaigapëri irobatacaganëri iroishate iraguiataiguëri igótsatironta irinibare. ⁵ Irari quero yoguiatiri ira te irogótsatiri. Irisigabitsatanëmari tenta irogótsatironi irinibare.

⁶ Icomantaiguëri Jesus oca quingabaguientsica carari te inguemaigabaquero matsiguenga ora icanqueri. ⁷ Aisati icanai Jesus:

—Nangantasantëmini ora aisonori, Naro nacantaro pibega sitëcori cara icaiguero oisha. ⁸ Antagaisati ira boquënguetsi cara teraique nopoque Naro irianti cosirinti,

aisati matobiantatsiri carari iriro te inguemaigabaqueri oisha. ⁹ Nacantaro sitëcori. Naanti irareantima Tosorintsiquë matsiguenga ira quemisanquinane. Aro iragabisaicoqueri Tosorintsi. Nantsibatëmarinta nomisantëri cara inganaque aisati cara nomisotocanairi aisa icantari oisha cara iromingabaqueri omisantantatsiri aique iraguiatëri sotoquë irapë. ¹⁰ Iroonti ipocasique cosirinti ingositëni oisha aisa iragamaguëri iripoguiriaqueri. Carari nipoque Naro nantimasanotaquerini matsiguenga arota inganinatasanotanë. ¹¹ Naro caninari omisantantatsiri. Ira omisantantatsiri ingamobiqueri iroishate aisa Naro nangamobitaiguëri antagaisati ira quemisanquina. ¹²⁻¹³ Ira iromeraro omisantantatsiri te iranintiri iromisantasantineri iroishate. Paniro inintiri quirequi iripënabintëri casintari oisha. Cara iraniobëri otsitiniro intsoroganëtiguiri irojocanëri oisha cagarinta irasi irisiganëma. Aro iráqueri otsitiniro oisha iragamaguequeri iromisiaguequeri. ¹⁴⁻¹⁵ Naro caninari omisantantatsiri. Nigótiri noishategui aisati igóiguina Naro. Aiquenta nangamobiqueri ira quemisanquinara. Iriro cantaca ibega noishate. Aisa nacanta Naro nigótiri Pabati aisati igótina Naro. ¹⁶ Ainta basiniatipague tojai inguemisantaiguëna. Iriro cantaca noishate aisati. Irirojegui nomapëri aitosati, inguemisanquero nanibare, nopatotaiguëri omagaro Naronta paniro iromisantantatsirite.

Jesos inibatëgotaca cara ingamaque.

¹⁷ Përosati yogomeanti Jesos:

—Iroro inintasantaguëtina Pabati aronta nangamobiqueri Naneni noishate aisati nanganiatae. ¹⁸ Quero pairi óguinane. Naneni camasibiriquimarine matsiguenga. Aisonori nangamasiquima Naro aisati nanganiatanae. Iroro ora igáquina Pabati.

Icantobitobacari Jesus.

¹⁹ Cara iquemaigabaquero jorío nibarintsica, te inguengaiguema icantobitobacari Jesus. ²⁰ Ainta icanque:

—¿Pairo piquemisantobiqueri inancarinta camagari? Irianti ichabënitaga, intaguetasitaro ora te inguenguema, teatisati iraneicotima.

²¹ Carari ainta basini icanque:

—Quero inibati sërari icanti negaca aroqueca inancari camagari. ¿Aroco iraniacagajiri camagari ira comarajari?

Ira joríojegui iguisaneinqueri Jesus aisati te iranintiri.

²² Cara tsaengaquë tojai jorío yapatotaigaca cara Jerosarénquë cara iquengaiguëro jirai cara yobetsiquëneri ibango Tosorintsi. ²³ Yanëisigui Jesus oquibequë pongotsi irasi Tosorintsi cara pinasegui omoro ora yobetsiquë Saromón jirai.

²⁴ Ishongaigapari jorío yosamitapëri:

—¿Ati ongantima pingomantëgotëma pairiraca pijita? Pingomantaiguena catingasati Obiroca Quirisito Agabisaicoontatsiri.

²⁵ Yotabitaiganaqueri Jesus:

—Aroque nocomantabitaguëmi carari te pinguemisante. Aroquesati nitasongantagueque ora igáquina Pabati Tosorintsi carari te

pinguemaigue. ²⁶ Teni pinguemisantaiguena cagariminta noishate. Ira noishate iquemisanquina. ²⁷ Aisati iquematsatina noishate ira quemisanquina, nigóiguiri Naro, aisati yoguiataiguina. ²⁸ Nomaiguëri përosati intiomotaiguëri Pabati Tosorintsi Jonogaguitequë. Nomisantasantaiguëri. Quero íati Sharincabeniquë, querootisati pairi ágabitsatinari. ²⁹ Iraegui ipëna Pabati, Ira obaqueri antagaisati. Iriro sintsirisonoriguinte. Quero pairi ágabitsatirine Pabati. ³⁰ Naro aisati Pabati paniro ninaigui.

³¹ Aito cara yágaigairo mopë jorío cara iromion-gatëqueri Jesus. ³² Icanqueri Iriro:

—Tojai piniaguëna cara nitasonganti. Tojai noniaguaguëmiro ora caninaro aroquenta igáquina Pabati. ¿Pairo pininti pobasegobitaiguëna?

³³ Yotabitaiganaqueri jorío:

—Quero nibasegaiguimi aroquenta picanque caninaro obiro. Orari nobasegobitaiguëmi cara picantocotaguetasitarinta Tosorintsi. Aisati cara pijitaja Tosorintsi Obiantinta matsiguenga.

³⁴ Icanqueri Jesus:

—Jirai Tosorintsi inibatantaro Sanguenari cara icantocoqueri ira jitacha joes: “Obirojegui tosorintsi”. ³⁵ Nigóiguero ora Irinibare Tosorintsi iroonti ora aisonori. Aroca Tosorintsi ijitaiguëri tosorintsipague ira joes, ³⁶ ¿Iroo paio picantocobiriquina cara nacantocotaguetasicari Tosorintsi aroquenta nacanque Naro Itomi Tosorintsi? Icasiriconiatiquena Pabati Tosorintsi aisa igáquina yaca quibatsica. ¿Aisatico

pingantocoqueri Tosorintsi: “Icantasica cara icanque ‘Obirojegui tosorintsi’ ”? ³⁷ Queroca nacantiro Naro ora icanti Pabati, quero piquemisantina. ³⁸ Carari aroca nanganquero, aro pinguemisantiro, queroca piquemisantiro nasi nanibare. Iroro pigóiganaquero përosati ainta Pabati Naroica, aisati Naro aintana Iriroquë.

³⁹ Aisati icogaigabitaca jorío iráguirime Jesus, carari isigopitanacari.

Iáque Jesus Joriránquë.

⁴⁰ Aique iáque Jesus Joriránquë imontianaca aiqero onamijaquë cara icontetiquero paba. Itimaque cara ibaotisantanti Joan jirai. ⁴¹ Ipocasitaiguëri tojai matsiguenga, icantocoqueri:

—Te iritosongante Joan, carari aisonori antagaisati ora icomantëgotëri ica sërarica.

⁴² Carari canta iquemisantaiguëri Jesus tojai matsiguenga.

11

Icamaque Irásaro.

¹ Ainta poro sërari jitacha Irásaro ijanaitasantë. Itimi Betaniaquë oboeborote iritsiro pite ora jitaigacha María aisati Márta. ² Oca María iritsiro Irásaro ira janaitatsi ora tiriqueri casangajengaro iguitiquë Jesus aisati pobiriantajari oguisi. ³ Oca pite iritsiro Irásaro pigántëri Jesus ocomantagantëri:

—Natingomi, ijanaitasantëni agabenisonori ira pininti pamigote.

⁴ Iquemobëro nibarintsi Jesus, icanque:

—Quero icami përosati. Ijanaitë arota ira matsiguenga iraniacandinataiguëri Tosorintsi caninarisonori aisati irogóiguëna matsiguenga Naro caninari Itomi Tosorintsi.

⁵ Ira Jesus inintasantiro Máríta aisati María aisati Irásaro, ⁶ carari igótabeca Jesus cara ijanaitasantë Irásaro, përosati itimaque pite cataguiteri cara inasegui Jesus. ⁷ Aique icanqueri irogomere Jesus:

—Intsome aisati Joreaquë.

⁸ Icantaiguëri irogomere:

—Ogometinari, cani icogaigabitaca jorío canta iróguimime iribasiquimime. ¿Yamai aisatico pijátaje canta?

⁹ Icanqueri Jesus:

—Cara irigontepë paba irosangueguitetocotaigapëri matsiguenga. Aroca iranëitë pairiraca cataguiteri quë quero intibata. ¹⁰ Carari caraca iranëique tsitiniriquë irantibaquima tenta ineti iguëtaguiterite. Aisa nacanta Naro quero nacami canta queroquerei pareta cataguiteri cara iróquina.

¹¹ Icanque negaca. Aitosa icanqueri:

—Yamai isamini namigote Irásaro carari najáque nangabacairi.

¹² Aique icantaiguëri irogomere:

—Natingomi, isaminica aro irobegajima.

¹³ Igóque Jesus cara aroque icamaque Irásaro. Inibatëgotëri cara icanque isamini, carari te inguemaiguero irogomere. Ijique iroso aisonori isamini Irásaro. ¹⁴ Aique icanque Jesus catingasati:

—Aroque icamaque Irásaro. ¹⁵ Caninataque te nine Naro canta arota pinguemisasantanëna. Yamai intsome ajáigue canta.

¹⁶ Tomás aisati ijita Tsipari icanqueri irogomere basini:

—Intsome eiro arota angamaigue aisati anganquimari Iriro.

Jesos inibatapëro Máríta.

¹⁷ Yaretaiganaca canta Betaniaquë. Icomantaigabaqueri aroque itiaiguëri otsibasati cataguiteri. ¹⁸ Aronisatiquë Betania otsibataro Jerosarén maba quirómetoro. ¹⁹ Iroero ipocasitaigapë tojai jorío iraganinataigapëro Máríta aisati María aroquenta icamaque ojariri. ²⁰ Cara oquemocotobëri Máríta Jesos piáque pitonguibotobacari, iroroque María përoca pinë pongotsiquë. ²¹ Ocabëri Jesos Máríta:

—Natingomi, aintamime pinasegue Obiro yaca, querome icami jai. ²² Carari nigóque naro imëmiro Tosorintsi antagaisati ora pomanaqueri.

²³ Icanëro Jesos:

—Ira pijariri aro inganiatanae.

²⁴ Ocanque Máríta:

—Jee, nigóque cara cataguiteriquë carantatsiri ingabiritaigaima antagaisati ira camënguitsi.

²⁵ Aique icanquero Jesos:

—Naro aganiataguetiri ira camatsi nomairi intimaje. Ira quemisantina ingamabequima carari cara aisa inganiatanae. ²⁶ Aisati antagaisati yamai ira caniarí iquemisanquina, aroca ingamaque yaca quibatsica, përosati intimanë canta Jonogaquitequënta. ¿Piquemisantiro oca?

²⁷ Potabitanëri Máríta:

—Jee, Natingomi. Naquemisantimi Obiro Quirisito. Obiro Agabisaicoontatsiri Itomi

Tosorintsi. Noguiaiguëmi cosamani Obiro cara popogopë yaca quibatsica.

²⁸ Pitsonquero pinibatë Mária, aique piáque ocaimëro María irento, ocanquero comanoroni:

—Ainta Ira ogomeantatsi. Icaimagantimini.

²⁹ Cara oquemobëro María oca, omanapague ocabiritanaca piáque Jesusiquë ³⁰ teraquerei iraretima Jesus poeboroquë, përo cara inasegui cara pitonguibotobacari Mária. ³¹ Aroqueque ipocasitaigapëro jorío arota iraganinatiro iritsiro Irásaro. Cara iniaigabaquero María ocabiritanaca omanapague pisotocanë, ijique cara piáque oraquima cara itiaca Irásaro. Aro yoguiataiganaquero. ³² Parecari María Jesus pobaticagueritotasipari ocanqueri:

—Natingomi, aintamime pinasegue Obiro yaca querome icami jai.

Jesos iracoqueri Irásaro aisati yoganiatairi icabiritajiri.

³³ Jesus iniobëro piragopa aisati iragaigapa jorío itsibataigaparo, icantaneintëgotëro Jesus yogasëretanaca, ³⁴ yosamitaiguëri:

—¿Nega pitiaqueri?

Icantaiguëri:

—Natingomi, omana pinetsapëri.

³⁵ Aro iraganaca Jesus. ³⁶ Icantaiganaque jorío:

—¡Pinetseri! Inintasantirini.

³⁷ Ainta basini jorío icantaiguë:

—Ica iniacagajiri comarajari; ¿Teco ingantiri Irásaro arota quero icami?

³⁸ Aisati icantaneintasantanaca Jesus yotsitipari cara itiacá Irásaro. Iroonti yasitocoontacari mopë.

³⁹ Jesus igáqueri jorío icanqueri:

—Posibitiro ora mopëra.

Ocanë Márita iritsiro Irásarotomaco:

—Natingomi, aroquejengari isititë aroquenta ocarati otsibasati cataguiteri cara itiacá.

⁴⁰ Carari icanëro Jesus:

—¿Teco nangantimi aroca piquemisantina, aro piniaquero itasorintsite Tosorintsi?

⁴¹ Aito cara yágaiguëro mopë yasirecoqueri. Inetsë Jesus jonoquë yamanocotanëri Iriri:

—Pabati, nacarasiaquimini piquemaquinanta.

⁴² Nigóque përosati piquemina carari ninibabentaiguëri ica matsiguengaca arota inguemisantaiguena aisati irogóigue Obiro agáquina.

⁴³ Aroque yamanaqueque icaimëri:

—¡Irásaro, pingabiritima pisotogopë!

⁴⁴ Aito cara isotogopai Irásaro caniari iponataparo tocoya ibacoquë aisati iguitiquë aisa iboroquë iponatapa. Igáqueri matsiguenga Jesus:

—¡Pintsaicotiri popabaquëajiri!

Aro icantaiguëneri.

Iquengaiganaca itingomipague jorío iróguiri Jesus.

(Mt 26.1-5; Mr 14.1-2; Ir 22.1-2)

⁴⁵ Ainta arosonori jorío aguiatapëro María. Cara iniaiguëri itasonganti Jesus iquemisantanëri tojai.

⁴⁶ Ainta basini jorío iáiguë bariseoquë icomantaiguëri antagaisati ora icanque Jesus. ⁴⁷ Aique ira bariseoegui aisati itingomipague saseriroti yapatotaiiguëri omagaro itingomiegui jorío. Icantaigabaqueri:

—¿Pairo anganqueri Ira sërarira cara itasonganti tojai? ⁴⁸ Queroca acantiri pairoraca, omagaro inguemisantaiguëri. Aisati iribocaigapë Iromasati irotëanëro intiboroquero oquibe pongotsi irasi Tosorintsi aisati irágopitaigacáiro aguebatsitejegui.

⁴⁹ Paniro jorío jitacha Caijás, iriro obatatsi itingomisonori saseriroti irooti osarini ora iribëquëgotanquimari Jesus. Icanqueri imatsiguenga Caijás:

—Te pigóigue obiro pairoraca. ⁵⁰ Teatisati pigóigue caninataque cara ingamobitaigacái poro sërari arota quero ipoguiriaigái Iromasati.

⁵¹ Te irinibatiro oca irineni Caijás. Irironta itingomisonori saseriroti, ocantacaqueri negaca Caninaro Isëre Tosorintsi, cara icantocoqueri Jesus ingamobitaiguëri omagaro jorío. ⁵² Aisati ingamobitaiguëri antagaisati ianiquite Tosorintsi negaraca itimagueti, irapatotaigairi. ⁵³ Yamai iquengaigaca itingomiegui jorío irobetsicaiguëro cara iróqueri Jesus.

⁵⁴ Iroro te iranëitaguëtaje Jesus Jerosarénquë carari isotocanë Joreaquë iáque poeboroquë otiomijani jitacha Eparaín aronisatiquë piriabatsaro cara tera ontimingani. Cara itimaiguë Iriro aisati irogomere. ⁵⁵ Pënibaque orequima cataguite ripague jitacha Pásicoa. Yametaiga jorío iriáiguë Jerosarénquë iraguëtetima queroquerai pareta Pásicoa. ⁵⁶ Icogaigabitacari ira Jesus. Cara ibangoquë Tosorintsi yosaminaitobaca:

—¿Pairo piquengaiga? ¿Aro iribocapë Jesus Pásicoaquë? ¿Queroco ipoqui?

⁵⁷ Aroque icomantaiguë bariseojegui aisati itingomiegui saseriroti aroca irogóque pairiraca negaraca ini Jesus ingomantëgotëri arota irágaigueri jorío.

12

Itiriquengani Jesus casangajengaro.

(Mt 26.6-13; Mr 14.3-9)

¹ Ocaranibati 6 cataguiteri teraiquerai oretima Pásicoa iáque Jesus poeboroquë ojita Betania cara itimi Irásaro ira camabitënguicha, ira yoganiatari Jesus. ² Yobetsicaiguëneri Jesus ora tojai perintsi. Iiroque Irásaro isobiacaqueri Jesus cara mesaquë. Iroroque Márta pamaigapëneri iraperi. ³ Aique pamapë María ongaraataga casangajengaro jitacha nãriro ora pënatacha tojai pitiripëri iguiti Jesus, pobiriantajari oguisi. Píaingatagueque omagaro pongotsiquë. ⁴ Aito cara icanque poro irogomere Jesus jitacha Joras Cariotisati. Iriati ira ágagantërine Jesus caraquenta. Icanque Joras:

⁵ —¿Pairo te omimantobitiro oca casangajengaro arota águiri 300 tenario? Aique omaiguëri omitocotaguetirime ira coguitiacha.

⁶ Joras, tenta iranintiri ira coguitiacha, iroro icantobique negaca irironta cosirinti iriatísati omisantaiguineri omagaro irogomere Jesus it-saguineegui. Caraquesatantata ingositëri quirequi. ⁷ Icanqueri Jesus:

—Ineta iroro oca. Aroque poguëro casanga-jengaroca irooti cara nangamaque. Cara quero-querai iteina, pomasangaengatobënaró. ⁸ Ainta përosati irinaigui ira coguitiachari obirojeguiquë, carari quero përosati ninagaiguimi Naro.

Iquengaigaca jorío iróguiri Irásaro aisati.

⁹ Tojai jorío iquemocotaiguëri Jesus cara ainta Betaniaquë. Iáigue cara iraniaqueri Jesus aisati Irásaro ira yoganiatai Jesus. ¹⁰ Iroro iquengaigaguëtaca itingomiegui saseriroti iróguiri aisati Irásaro ¹¹ aroquenta iniasantëri tojai jorío ira Irásaro, ijocaiganaqueri saseriroti yoguiataiganaqueri Jesus iquemisantaiganaqueri.

Icanaque Jesus Jerosarénquë.

(Mt 21.1-11; Mr 11.1-11; Ir 19.28-40)

¹² Tojaisonori jorío yapatotaigapa cara Jerosarénquë ora cataguitèripague jitacha Pásicoa. Oquëtaguetanë iquemocotaigabaqueri Jesus pënibaque irarepëma, ¹³ iáque icarasitëneri ora cantaca chorinasi itonguibotobacari imatacoboguitëneri icaimaiguë catsigue yamanaiguë:

—¡Caninarisonori Tosorintsi! ¡Coraguetaque Agabisaicoontatsiri caninari! ¡Igåquinari Tosorintsi! ¡Obirai Natingomiegui! Pigáantë pinganquimari ibega David cara igáanti jiraisonori.

Icantaigabaqueri negaca joríojegui.

¹⁴ Jesus iniaqueri oboina boro iqueicocari cara ocanti Sanguenari jirai:

¹⁵ Quero pitsorogui, obirojegui pitimaigui pöbóroquë jitacha Sión. Pinetsaigabaqueri

Pitingomi Ira bocatsi iqueicocari oboina boro.

¹⁶ Antagaisati oca te inguemaigabitimaro irogomere Jesus. Aiquentata cara icamaque Jesus icaniatanai yogainocaa cara Iririquë cara yoguibatobëri, aro yamai iquemaiguëro irogomere. Aro igótocotobëri antagaisati oca isanguenatocoqueri jirai. Irooti cara omoncaraca. ¹⁷ Ira matsiguenga neiri Jesus cara icaimëri Irásaro yoganiatairi yamai icomantagueantëro ora iniaiguë. ¹⁸ Iroro iátaguëque matsiguenga itonguibocari Jesus aroquenta igótocoqueri cara itasonganti. ¹⁹ Iniaigabaqueri bariseo cara iátagueque matsiguenga icantobaganaca:

—Yamai pinetsabaqueri irobacáini. Yoguiataiguëri omagaro.

Ipocasitaiguëri Jesus guiriego.

²⁰ Cara Jerosarénquë ipocaigapë arosonori matsiguenga iromanocotaiguëriini Tosorintsi. Aintasati guiriego icogaiguë irogótasantiri Tosorintsi. ²¹ Yotsititaigapari ira Jeripe, Betsairasati ipaniaca cara Garireaquë. Icampëri:

—Namigote, nanintaiguini naneiri Jesus.

²² Iáque Jeripe icomantëri Antiris. Iáiguë pitirooti icomantëri Jesus.

Icomantë Jesus cara ingamaque.

²³ Icabëri Jesus:

—Nopaniaca canta jonoquënta. Nomatsiguen-gatapë. Yamai aroque pareca cataguiteri cara nangamaque nanganiatanae najátaje Jonogaguitequë aisati. Aro iraniacandinatasantaiguëna

matsiguenga. ²⁴ Nangantasantëmini ora aisonori, queroca ocamì poro oguitso tirigo panguitacha quibatsiquë, quero otojaiganaque patironta inë, carari omanguitëmaca ianë ontojaiganaque.

²⁵ Eiro aisati angantimaro pibega oguitso tirigo. Ira nintasanotacha iriati icogui intimasante yaca quibatsica, quero iáti Jonogaguitequë. Irari cantaneintëgotiri basini matsiguenga, te inguenguema paniro iriati, aro intimaque Jonogaguitequë përosati.

²⁶ Aintaca nintatsi ingantinaro aisati inguemisanquina iraguiatina negaraca najátacaqueri. Aitosati intiomoquina cara natimi Jonogaguitequë. Inganqueri Pabati Tosorintsi: “Caninataque ora picanque”.

²⁷ —Yamai nogasëretasantanaca. ¿Pairo nangaque? ¿Nomanocoquimanico: “Pabati, pigabisaicotina ora pënibaque natsipiriaquero? Quero nacantiro, iroronta nipocasique quibatsica natsipiriaquineri matsiguenga. ²⁸ Pabati, nocogasanti ingantocotimi matsiguengajegui: ‘Caninarisonori Tosorintsi’ ”.

Aito cara iquemaibagaquero matsiguenga Irinibare Tosorintsi jonoquë icanque:

—Aroque noniagaigacari caninarina. Përosati nangantajiro aisati.

²⁹ Aintapague matsiguenga canta iquemaigabaquitiguiro Irinibare Tosorintsi icanque:

—Iroonti tijiringa.

Ainta basini cantaigatsi:

—Inibatërinijengari ironomire Tosorintsi.

³⁰ Yotabitaiguëri Jesus:

—Inibatëna Tosorintsi arota pigóiganaque obirojegui iquemina Iriro. Aroque nigótiro

Naro. ³¹ Yamai ingasitígataiguëri Tosorintsi antagaisati te inguemisantina. Aitosati Tosorintsi irioquëri jaara Satanás irironta agáqueri iraegui te inguemisantina. ³² Intinaiguënaca canta jonoiqueronta, iroro nopatotantaiguëmari antagaisati matsiguenga, iribocasitaiguëna ira quemisanquinane.

³³ Cara icanque negaca icomantëgotaca Iriati ingamaque cara corosiquë.

Yosamitaiguëri Jesus jorío.

³⁴ Yotabitanëri jorío icanë:

—Nigóontacaro Sanguenariquë cara përosati intimaque Quirisito. ¿Pai ri picantocoque Obiro Ira paniacha jonoquë aisati imatsiguengatapë intinaaqueri jonoiqueronta? ¿Pai ri casintari Ira paniacha jonoquë?

³⁵ Icanqueri Jesus:

—Ora nogometimi yamai aisa ocantaro cataguiteri. Posangueguitetocotimi. Iroontita ninë obiroquë panëiguitetaigue cataguitერიquë queroquerai otsitinitocotaiguimi. Ira anëitatsi tsitiniriquë te irogóte atiraca iriátë. ³⁶ Naro aisati nacantaro cataguiteri nosangueguitetocotaiguimi. Iroontita ninë obirojeguiquë, pinguemisantaiguena arota panëiguitete cataguitერიquë. Aro pigóiguëro ora aisonori.

Cara itsonquero oca irinibareca, iáque Jesus imánopitaigacari.

Pairo te inguemisantobitiri Jesus jorío.

³⁷ Tojai itasonganque Jesus catingasatiquë joríojegui, carari te inguemisantaiguëri.

38 Omoncaraca ora isanguenaque jirai Isaías comantantatsiri cara icanque:

Natingomi Notosorintsite ¿Paii quemisanquero nanibareegui? ¿Paii poniaguë pitasorintsite?

39 Aitosati Isaías isanguenatocoqueri ira te inguemisantaigue inguemabequima icanquero:

40 Nangantacaquimari quero iniaigui ora icanti Tosorintsi, querootisati icogaigui inguemisantina, querootisati iquenguina, querootisati ipasiniatitaji, querootisati nogabisaicotajiri.

41 Isanguenaquero Isaías negaca aroquenta iniaquero Jesus caninarisonoriguente icomantëgotëri. 42 Carari ainta tojai jorío aitosati ainta itingomi iquemisantabecari Jesus, carari te ingomantomotiri matsiguenga itsorogaiguërinta bariseo. Iquengaigaca: “Inguisaneinquina bariseo, quero inintacaguina naqui cara yapato-taiga nomatsiguenga”. 43 Ira quemisantabetacha icogasanti irianicaninataiguëri matsiguenga carari te ingogue irianicaninatiri Tosorintsi.

Irinibare Jesus ongomantëgotëri ira te inguemisantiri.

44 Icaimë Jesus icanque:

—Ira quemisantina Naro, te paniro Naro, aisati iquemisantiri Pabati Ira agáquina.

45 Ira neina Naro, aisati iraniaquero Ira agáquina. 46 Nosangueguitetocotiri omagaro matsiguenga. Nipocasique Naro yaca quibatsica arota quero yanëitantaigaro tsitiniri ira quemisanquinane. 47 Ainta poropague

quemabitacaro nanibare te inguemisantina, quero nacasitígatiri yamai tenta nopoqueni nangasitígatiri matsiguenga. Nipoguini nagabisaicotajiri ira quemisanquinane. ⁴⁸ Ira te irágobëna Naro teatisati inguemisantobëro nasi nanibare, aiquenta nanibare ongomantëgotëri. Queronta iquemisantiro nanibare ingasitígatëri Tosorintsi cara cataguitëriquë carantatsiri. ⁴⁹ Teni nanibatasitima iroonti ninibati ora igáquina Pabati. Igáquina Iriro omagaro ora ninibatë aisati ora nogomeantë. ⁵⁰ Nigóquero ora igáquina Pabati iroonti Nibarintsi timagantatsiri. Iroro patiro ninibati ora igáquina Pabati.

13

Jesos iquibaguitaiguëri irogomere iguitiquë.

¹ Terai oretima Pásicoa cara iquengaigairo jorío cara isotocaigai Ejípitoquë jiraisonori. Igóque Jesus aroque pareca cataguitëri cara irojocanëro quibatsi iriátæ Iririquë. Cara inintasantaiguëri quemisantatiri Jesus yaca quibatsica, yamai inintasantasanoiguëri. ² Cara yapaigasegui, aroque iquiancacari Satanás ira Joras itomi Simón ipaniaca Cariotiquë cara irácagantëri Jesus. ³ Igóque Jesus aroque ipëri Iriri omagaro. Aisati igóque ipaniaca Tosorintsiquë aisati yamai iripiganajima jonoquë. ⁴ Icabiritanaca mesaquë, isaboquëro imanchaqui, yáguëro oquibiantsa tocoya imatsaguitanacaro, ⁵ ishëro nija irabatarioquë, aro iparintaca iquibaguititaguequeri irogomere aique iseantaari tocoyaquë ora imatsaguisiga.

⁶ Cara pënibaque inguibaguitiqueri Simón Peroro aro yosamitëri Peroro:

—Natingomi ¿Pinguibaguitiquinanico naro?

⁷ Yotabitanëri Jesus:

—Yamai teni pinguemiro ora nacanti, aiquenta pinguemaquero.

⁸ Carari icanë Peroro:

—Naro quero piquibaguititina.

Yotabitanëri Jesus:

—Queroca naquibaguititimi, quero pini Naroica.

⁹ Aique icanqueri Simón Peroro:

—Natingomi, querori patiro piquibiro naguiti. Aisati pinguibaquina nobacoquë, pinguibaquina naguitoquë.

¹⁰ Icanëri Jesus:

—Ira quibacha irirai quero iquibaja omagaro, patiro iguitiquë inguibima aroquenta irinaga yoguëteta. Obirojegui pinaga poguëtetaiga paneingomentoquë carari te antagaisati pinguëtetaigue.

¹¹ Icanque Jesus: “Teni antagaisati pinguëtetaigue”, aroquenta igóque pairiraca ágagantërine. ¹² Aroqueque iquibaguititaiguëri Jesus icairo imanchaqui aisati, isobiaque mesaquë. Yosamitëri irogomere:

—¿Pigótaiguëro oca nacantaiguëmica?

¹³ Pijitaiguina Ogomeantatsiri aisati pijitaiguina Pitingomi. Picantaiguero ora aisonori Naronta Pitingomi. ¹⁴ Aroquenta naquibaguititaiguëmi

Naro Ogomeantatsiri aisati Pitingomi, caninataque pinguibaguititobaguima aitosati obirojegui. ¹⁵ Noniaguëmiro ora pingantaiguë aisa pinganquero obirojegui ora nacantaiguëmi

yamai. ¹⁶ Nangantasantëmini ora aisonori. Ira iromerataga quero ibatiri ira meratari, aisati icanta ira iragátaga quero ibatiri ira agátirira.

¹⁷ Aroca pinguemaquero oca nocomantëmica, aro pinganinataiganaque pinganqueroca.

¹⁸ Teni nanibatëgoiguemi omagaro obiro nigótasantimininta aroquenta nocoiguëmi. Nocoiguëmi arota omoncaratima Sanguenari ora ocanti:

Ira pëcoquina pan yamai iguisanëintanaina. Icoque iróguina.

¹⁹ Nocomantaiguimiro negaca cara iróquinaca pinguengero, përosati pinguemisanquina Naantinta Agabisaicoontatsiri.

²⁰ Nangantasantëmini ora aisonori pairiraca ágobërine ira nagáque aitosati irágobënanisati Naro. Ira ágobëne Naro aisati irágobëri Pabati Ira agáquina Naro.

Jesos icomantëgotëri ira ágagantërine.

(Mt 26.20-25; Mr 14.17-21; Ir 22.21-23)

²¹ Cara inibatë negaca Jesos yogasëretasantanaca icantaiguëri irogomere catingasati:

—Aisonori nangantasantëmini, ainta paniro obirojeguiquë ira ágagantëne.

²² Aique inetsabacagaguetanaca irogomere Jesus. Te irogóigue pairiraca ira inibatëgotë Jesus.

²³ Paniro irogomere ira inintasanti Jesus yapanamitacagasegui. ²⁴ Simón Peroro ijigotanëri ira panamisiguiri Jesus arota irosomitiri pairiraca ira inibatëgotasegui Jesus. ²⁵ Ira panamisiguiri Jesus inebintasitanacari yosamitëri:

—Natingomi, ¿Pari pinibatëgoti?

²⁶ Yotabitanëri Jesus:

—Ira nomë pan nagaatane, iriro ninibatëgoti.

Aro yogaatëro pan ipëri Joras Cariotisati itomi Simón. ²⁷ Yágobëro pan Joras aito cara inantanacari Satanás. Aique icanqueri Jesus:

—Ora picogui pingantiro, pingantiro omanapague.

²⁸ Iquemabecaro basini irogomere Jesus. Te poro quemasantobërine Jesus. ²⁹ Irironta Joras omisantineri iguirequite irogomerejegui, ainta ijique igáquerini Jesus iromanante Joras ora asi jiesita. Ainta basini ijique igáquerini imëri quirequi ira cogutiachari. ³⁰ Cara yapëro pan Joras isotocanë, aroque otsitinitanë.

Jesus igáqueri irogomere: “Pinintobaganëma”.

³¹⁻³² Aroqueque isotocanë Joras, icanque Jesus:

—Omanapague yamai irianicaninataiguëna matsiguenga, ingantocotaiguëna: “Caninarisonori Ira paniacha jonoquë imatsiguengatapë”. Aitosati ingantocotaiguëri Tosorintsi: “Caninarisonori Tosorintsi aroquenta igáqueri Itomi yaca quibatsica”. Aisati yamai ingantocoquina Tosorintsi: “Ira matsiguenga irianicaninataiguerita Notomi”. ³³ Obirojegui cantaca najaniquite, arosata yamai ninagaiganajimi cara queroquerai niáti. Pingogabetajina, carari cani jirai nocomantaiguëri jorío, aisati yamai nongomantaiguimi obiro: quero piáti cara najáque Naro. ³⁴ Oca nagáquemi irorai, pinintobaganëma. Aisa nacanta Naro nanintasanotaiguimi, aisati pinintasanotobaguima. ³⁵ Aroca

pinintobaganëma, aro antagaisati matsiguenga irogóiguemi obiro nogomerejegui.

Inganque Peroro: “Teni nogótiri Jeos”.

(Mt 26.31-35; Mr 14.27-31; Ir 22.31-34)

³⁶ Icanëri Simón Peroro yosamitëri Ira Jesus:

—Natingomi ¿Nega pijáque?

Yotabitanëri Jesus:

—Cara najáque quero poguiatina yamai.

Aiquenta piguiatapëna.

³⁷ Icanqueri Peroro:

—Natingomi ¿Pairo quero noguiabiritimi yamai? Aroca nangamobiquimi nocoguini naguiatimi.

³⁸ Yotabitanëri Jesus:

—¿Aisonori pingamobiquinaca? Nangantasanotëmini aisonori cara queroquerai icaimi tiapa sërari, maba pingantocoquena: “Teni nogótiri”.

14

Jesos Iriro abatsisonori irooti Jonogaguitequë.

¹ Aitosati yogometaguëri irogomere Jesus:

—Quero pogaserëtaiganaca. Aroque piquemisanqueri Tosorintsi, yamai pinguemisan-taiguena Naro aisati. ² Canta itimi Pabati aiti tojaisonori pongotsipague.

Queroca pini, nongomantaiguëmiro. Carari yamai najáque nobetsicaiguëmiro canta. ³ Cara najáqueca nobetsicaiguëmiro pongotsi, aique nopigasitaigaantimi Naro nágaiganajimi canta,

atiraca ninë obirojegui aitostati pintiomoquina.

⁴ Pigóiguë obirojegui atiraca najáque, aisati pigóiguëro abatsi.

⁵ Icanqueri Tomas:

—Natingomi, teni nogóigue atiraca pijáque, ¿Ati-roco ongantima ca nogóiguëro abatsi?

⁶ Yotabitanëri Jesus:

—Naro abatsisonori noniaguëmi atiraca ongantima piretaiguëma cara najáque. Aisati noniaguëmiro ora catingasati, aisati nantimacaquimi cara pinguemisanquinanica. Quero pairi játasitirine Pabati Tosorintsi, Naanti iriátanquima cara irarequimari Pabati. ⁷ Arome pigóquina Naro pigóitëmarime Pabati aisati. Yamai pigóiguëri aroquenta piniaqueri.

⁸ Icanqueri Jeripe:

—Natingomi, poniagaiguenari Piri, arota nanganinataigae.

⁹ Yotabitanëri Jesus:

—Jeripe, cosamani natsibataiguëmi. ¿Teraico pigóiguena? Ira niaiguëna iniaquerisati Pabati iriro. ¿Pairo pamanobiquina noniagaiguëmiri Pabati? ¹⁰ ¿Teco pinguemina Naro inatsi cara Pabatiquë aisati Ira Pabati inina Naroica? ¿Teco pigóigue Naro aisati nacantari Pabati? Oca nibarintsica ninibataiguimica, teni Naro nibatirone. Ninibatëro ora icanquena Pabati. Ira Pabati Ira inina Naroica Iriro Ira antiro paniro itarobacaare. ¹¹ Pinguemisantina aintana Naro cara Pabatiquë aisati Iriro inina Naro. Teca pinguemisantiro nanibare, pinguengero cara nitasanganti, aro pinguemisantënaró.

Icanqueri irogomere Jesus iragáquineri Caninaro Isëre.

¹² Përosati inibataiguëri irogomere Jesus:

—Nangantasantaiguëmini ora aisonori ira quemisanquinane Naro aro inganquero ora nacanti Naro cara nitasonganti Naro. Iritosongasantanë najáqueninta cara Pabatiquë. ¹³ Antagaisati pomanaiguëna piquemisanquinaninta Naronta Pitingomi aro nanganquimiro Naro arota ingantocotaiguëri Pabati matsiguenga: “Caninarisonori Tosorintsi ipaigainarinta Itomi”. ¹⁴ Nomaiguëmiro pairorapageraca pomanaiguëna obirojegui piquemisantinaninta Naronta Pitingomi. ¹⁵ Aroca pinintaiguinanica obiro, pinguemisantiro ora nagáantane. ¹⁶ Aroca pingantiro, nomanocoqueri Pabati: “Pomagantineri basini Omitocoontatsiri”. Aro imagantaiguëmiro inëmi përosati. ¹⁷ Iroonti Caninaro Isëre Tosorintsi ora ogometaiguëmine aisonori. Ira te inguemisantiri Tosorintsi quero yágobëro Isëre Caninaro tenta iraneiro teatisati irogótiro. Carari obiro pigóiguero aroquenta otsibataiguëmi, aitosati yamai përo cara inaignuëmi. ¹⁸ Yamai quero nojocaiganaquimi përosati. Aiquenta nopigaima nantsibataigapaimi. ¹⁹ Caraquesatantata quero iniaigaina matsiguenga, carari aronta nanganiatanae obirojegui piniajina. Përosati pintimaiguë caniarinanta Naro. Naganiataigapaimi përosati. ²⁰ Cara cataguitiquë opoque Isëre Caninaro pigóiguë cara ninë Pabatiquë, aisati obirojegui cara Naroquë aisati Naro obirojeguiquë. ²¹ Ira ogótiro ora nigáantë aisati iquemisantina, inintina aisati, aisati Ira Pabati inintasantiri ira nintina Naro. Aisati naninqueri Naro noniaguëmari iriro.

22 Ira basiniati Joras, cagari Cariotisati, yosamitëri icanqueri:

—Natingomi, ¿Pairo poniagobitaiguëna naantijegui, aro quero poniaguiri basiniati matsiguenga?

23 Yotabitanëri Jesus icanëri:

—Cara iraninquinaca matsiguenga iriátsaquina ora nacantiri, aro iriro iraninque Pabati. Apa aisa Naro nopogaigapë nantimacagaigapëri.

24 Ira te iranintina teatisati iriátsatina. Oca nibarintsica piquemisantaiguëca obirojegui cagaro nasiati iroonti irasi Pabati Ira agáquina.

25 Yamai nocomantaiguëmiro antagaisati oca aintanaquerainta natsibataiguëmi obiro. 26 Cara opogopë Omitocoontatsiri ora jitacha Caninaro Isëre Tosorintsi, iragáquemiro cara nomanakeri Pabati arota oniagaiguëmiro antagaisati aisati onguiancagaiguëmiro antagaisati ora nacanque.

Icomantanairi irogomere Jesus cara iriátae.

27 Përosati icanairi Jesus:

—Nimagoriasëreti Naro. Aisati nomaiguëmiro pomagoriasëretaiganaque obiro. Ira te inguemisantina inganinatë arosata yaca quibat-sica, carari ora nomëmiro pomagoriasëretaquemi cara paneingomentoquë. Quero pogasëretaiga querootisati pitorogaigui. 28 Aroque piquemaiguëna cara nacanquemi: “Najátaje aisa nopigaima nantsibataigapaimi aisati”. Aisonorica pinintaiguina pinganinataiganaque cara pigóiguë najátajeni cara Pabatiquë Irironta obatina. 29 Yamai nocomantëmiro negaca arota cara omoncaraquima përosati

pinguemisantaiganaque. ³⁰ Yamai quero ninibataigaimi tojai obirojegui aroquenta ipogopë Satanás ira agáqueri iraegui te inguemisantina. Quero ibatina, querootisati yagobeina. ³¹ Aro onganquima negaca arota omagaro matsiguenga irogótocotaiguëna nanintasantiri Ira Pabati aisa nantineri ora igátina. Pingabiritaiganaquima intsome.

15

Jesos yosiacaro otsa oba.

¹ Përosati icanqueri irogomere Jesus:

—Nosiacaro Naro panguirintsi otingomitsa oba. Iriroquerai Ira Pabati aisa icantari ira omisantiro panguirintsi. ² Iripëshataguequero ora te inantima oguitso. Iroroque ora otsa pinanta oguitso, iritotëro arosata irobetsataguequero arota inasantanë oguitso. ³ Obirojegui aroque piquëtetantajaro nanibare ora nopaignëmira. ⁴ Coshoni pogaiguina nibega Naro coshoni nogaiguimi. Quero pini oguitso otsapaguequë queroca coshoti pobatsaro otingomitsa. Aitosati picantaro pibega otsa oba. Queroca coshoni pogaiguina quero picantiro ora caninaropague. ⁵ Naro otingomitsa oba. Obirojegui otsapague. Ira coshoni yoguina Naro aisati Naro coshoni noguiri iriro inganque tojai caninaro. Queroca coshoni poguina, quero picantëmatiro pairorapagueraca caninaro. ⁶ Ira quero coshoni yoguina Naro irioquëngani jaara ingasitígatëri Tosorintsi. Ira sërari cantaro pibega otsa ora te inantimaro oguitso, aro

iripëshëro osiguiricanë; aro iráguequero iritaguëro. ⁷ Aroca obirojegui përosati coshoni pogaiguëna Naro querootisati pomaguisantiro nanibare, pomanina ora picogui, aro nomëmiro. ⁸ Cara pingantaiguëro ora caninaro, piniacaguiiri matsiguenga iraniacaninatiri Pabati. Aisati pingantaiguëma nogomere caninari.

Jesos ijtaguetiri irogomere iramigote.

⁹ Përosati icanai Jesus:

—Naro nanintasantaiguëmini obirojegui ibeguina Pabati cara inintasanotina Naro. Përo cara coshoni poguina Naro arota pigóigue cara nanintaiguëmi. ¹⁰ Pijátsataigueroca ora nigátimi Naro, pigóiguë cara nanintaiguëmini, aisa ocanta naquemisantiro Naro ora igátina Pabati përo cara nacaninati inintinaninta Iriro. ¹¹ Iroero ninibataiguëmi negaca arota pinganinasëretasantanë aisa nacanta nacaninati Naro. ¹² Yamai nagáiguëmi cara pinintobaganëma aisa nacanta nanintaiguëmi obirojegui. ¹³ Cara ingamobiquerica iramigote ira matsiguenga, iriro inintasanoti. ¹⁴ Obirojegui namigote aroca pinganquero ora nigátimi Naro. ¹⁵ Teni najitaigaimi nomeraro yamai tenta irogótiro iromerataga ora inganque meratari, carari najitaiguëmi namigote aroquenta noniagaiguëmiro antagaisati ora icanquina Naro Pabati. ¹⁶ Obirojegui te pingoiguena Naro. Carari Naro nocoigaiguëmi obirojegui aisa nigátaiguëmi pijátaigue pingantiro tojai caninaropague përosati inë. Aique pairorapagueraca pomanocotiri Pabati obironta nasiati, aro imaiguëmiro

piquemisantinaninta. ¹⁷ Iroro yamai oca nigátimi cara pinintobagaiganaquima.

Ira tsoengaigatsi iguisaneinqueri Jesus aisati iguisaneinqueri ira irogomere.

¹⁸ Përosati icanë Jesus:

—Inguisaneinquiminica ira te inguemisante, pinguenguero natsita iguisaneinque cara teraiquerai inguisaneintimi obirojegui. ¹⁹ Iraegui te inguemisantiri Atingomi inintobagaigaca. Querotame piquemisanti obirojegui aisati iran-intaiguëmime, carari obirojegui nocoigaiguëmini nágaiguëmi irirojeguiquë nopasiniatitaiguëmi. Iroro iguisaneintaguëtaiguëmi yamai tenta pintsibataiguemarini obiro. ²⁰ Pinguenguero ora nacantaiguëmi cani ira iromerataga quero ibatiri ira meratari. Cara iguisaneinquina Naro matsiguenga aisati inguisaneintaiguëmi obirojegui. Teca inguemisantatsatina Naro querootisati iquemisantatsatimi obiro. ²¹ Antagaisati oca aro ingantaiguëmi obironta nasiati. Inguisaneintaiguëmi tenta irogótiri Ira agáquina Naro. ²² Aro nipocasiqueri nocomantaguequeri matsiguenga ora aisonori. Querome nipocasitiri ira te inguemisantina quero iniaiguiri Tosorintsi cara icantomotaguequeri ora te onganinate. Carari yamaica Tosorintsi iniaiguëri cara icantaguetomotasantiri te onganinate. ²³ Ira quisaneintina Naro aisati iguisaneintiri Pabati. ²⁴ Querome nitasonganti catingasatiquë irirojegui ora te ingantiro basini matsiguenga, quero iniaiguiri Tosorintsi cara icantaguetomotiri ora te

onganinate, carari yamai iniaigabitëna cara nitasonganti përosati iguisaneinquina Naro aisati iguisaneinqueri Pabati. ²⁵ Carari omoncaraca cara isanguenatocoquena comantantatsiri jirai: Iguisaneintasiiguëna te paio nantabitima.

²⁶ Cara nagáquemiro Omitocoontatsiri ora jitacha Caninaro Isëre Tosorintsi, Iroero aisonori, omaniëma Pabatiquë aisati ongomantëgotëna Naro. ²⁷ Aisati pingomantëgotaiguëna obirojegui aroquenta pitsibataiguëna cara obirai nacaimaiguë irooti yamai.

16

Ira jorío inguisaneintaguëri irogomere Jesus.

¹ Aisati icanque Jesus:

—Aroque nocomantaguequimiro oca arota quero pitsoinguri Tosorintsi. ² Aiquentata quero inintacaguimi jorío picaigai cara yapatotaiga iriro. Aisati orequima aiquentata cara irógaiguëmi matsiguenga ijique intëneri Tosorintsi caninasati.

³ Inganquero negaca tenta irogótiri Pabati teatisati irogótina Naro. ⁴ Nocomantaiguëmiro yamaica arota cara orequimaca cataguiteri, pinguengaigairo ora nacantaiguëmi jirai. Teni nongomantimiro cara jirai aintananta Naro natsibataiguëmi obiro.

Ora onganque cara opogopë Isëre Tosorintsi.

⁵ Përosati icanai Jesus:

—Carari yamai najáqueni cara nantiomopairi Ira agáquena jirai. Quero ini pairiraca osamitënane negaraca najáque. ⁶ Carari pogasëretaiganaca cara nocomantëmi cara najátaje. ⁷ Yamai

nongomantaiguëmiro aisonori caninataque cara najátaje. Queroca niátaji quero pipoqui ora omitocotaiguëmine. Carari aroca najátaje, aro nomagantaimiro Naro. ⁸ Cara opogopë Isère Tosorintsi onguiancagopëri matsiguenga cara aisonori icantaguetomotiri Tosorintsi ora te ongomeite, aisati oniagapëri ora catिंगari, aisati ogótacagopëri cara irogóontëmari Tosorintsi ingomantëgotëri matsiguenga pairoraca inganque. Aisati ingomantëgotëri cara iriátë Jonogaguitequë queroca iáti Sharincabeniquë. ⁹ Ogótacagopëri iriro cantaguetatsiri te onganinate tenta inguemisantinani. ¹⁰ Aisati oniagaigapëri matsiguenga cara Naro Caninari aronta najátaje canta íniro Pabati, carari obirojegui quero piniaigaina. ¹¹ Ogótacagopëri cara ingasítigatëri irirojegui Tosorintsi aroquenta icasítigatëri Satanás ira agáigui ira te inguemisantiri Tosorintsi. ¹² Arosonori ora nocogui nongomantaiguemi carari obirojegui quero piquemaigabaquero yamaica. ¹³ Cara opogopë Isère Caninaro Tosorintsi Iroro comantaiguëmine omagaro ora aisonori queronta Iroro nibatasitacha. Onganquero antagaisati ora icomantëro Pabati atiraca onganquema aiquentata. ¹⁴ Oniacaninatagaiguëmi Naro Pitingomi aroquenta págaigabaquero ora nasiati aisati oniagaiguëmi obirojegui. Antagaisati ora yogomequero Pabati, irootisati ogometaguëmi obirojegui. ¹⁵ Aisati ora Isère Caninaro ágobëro ora nasiati ogótacaquimiro Iroronta ogometocoquinane.

*Iragasëretanëma irogomere Jesus, aique ingani-
nasëretanae.*

¹⁶ Përosati inibatë Jesus:

—Caraguesatantata cara quero piniagaina, caraquentata piniagaina aisati caranta najátaje cara íniro Pabati.

¹⁷ Aique yosamitobaguetanaca irogomere Jesus:

—¿Pairo oca icantáica Jesus caraguesatantata cara quero aniajiri aique caraquentata aniaigairi? Aisati ¿Pairo ocanti cara iriátë Iririquë? ¹⁸ ¿Pairo ocanti oca nibarintsica caraquentata? Teni anguemaiguero pairoraca inibati Jesus.

¹⁹ Jesus igóqueri cara icogabeca irosomiquerime irogomere aro icanëri:

—Aroque nacanquemi caraguesatantata quero piniagaina carari caraquentata aro piniagaina. ¿Iroro posaminaitobagaiguëca obirojegui? ²⁰ Nangantasantëmini ora aisonori piraicotaiguëna aisati pigasëretaiguëma carari ira te inguemisante inganinaigabitanëma. Carari obirojegui yamai pigasëretaigabitëma aique pinganinataiganaje. ²¹ Obiro aisa picantaro pibega tsinane. Cara ontsomaenica ongatsitasantë aisati ogasëretanëma, carari aroqueca otsomaaqueri otomi quero oquengairo cara ocatsitë carari yamai ocaninatasantanë aroquentata otsomaaqueri otomi. ²² Aisati obirojegui pogasëretaigaca yamai carari Naro nopigaima naniaigaimi, aro pinganinasëretasantaiganaque, quero pairi agasëretacaguimine aisati. ²³ Cara cataguiteriquë quero posamitëmatina. Nangantasantaguëmini

ora aisonori, Ira Pabati aro imëmiro ora pomanaqueri piquemisanquinanta Naro. ²⁴ Terai obirojegui pomanaigueri pairoraca Naronta Pitingomi. Pomane piquemisanquinanta aisati págobëroti arota pinganinatasantaiganaque.

Jesos icomantëgotasantëri Iriri.

²⁵ Aisati yogomequeri irogomere Jesus:

—Nacantaiguëmiro oca quingabaguirentsiquë ora ogomeantatsi, carari orequima cata-guiteri cara quero ninibatantaigaimiro quingabaguirentsi. Caraanti catingasati nogometocotaiguëmiri Pabati. ²⁶ Cara aique pomanaqueri Pabati piquemisantinata carari Naro quero namaniri Ira Pabati Tosorintsi cara imaguëmiro obirojegui ora pomanaqueri ²⁷ carari Ira Pabati inintaiguëmini pinintaiguinaninta Naro aisati piquemisantaiguina Naro cara nopaniaca Tosorintsiquë. ²⁸ Nisotogopë cara Pabatiquë nipogopë yaca quibatsica, carari yamai nojocanaïro quibatsi nopiganajima cara Pabatiquë.

²⁹ Aro icanëri irogomere:

—Yamaica pinibataiguëna caninasati. Teni pinibatantimaro quingabaguirentsi. ³⁰ Yamai nigóigui cara pigóque Obiro antagaisati, quero nocogaigai nosamitimi. Iroro ora nigóontaiguëmi cara popaniaca Tosorintsiquë.

³¹ Yotabitanëri Jesus:

—¿Aisonori yamaica piquemisantaiguëna? ³² Yamai orequima cataguiteri, aroque yamaica-sonori cara obirojegui pomorocaguetaiganaque jaara panirootipague. Aisati pijocaiganaquina

paniro Naro. Carari teni paniro ninë aintasati Pabati yaca Naroica. ³³ Yamai nocomantaiguëmiro oca arota pomagoriasëretaique piquemisantinanta. Iratsipiriacagaiguëmi ira matsiguengajegui ira te inguemisante yaca quibatsica. Pinganinasëretaiquinaque aroquenta nobataiganaqueri irorojegui.

17

Iriati Jesus manëgotacha.

¹ Cara itsonquero inibatë Jesus inetsanaque ai-
quero Jonogaguite icanë:

—Pabati, aroque pareca cataguiteri cara inganquina matsiguenga ora picogui Obiro. Yamai pigótacaguiri matsiguenga ora Naro Caninarisonori Pitomi, arota aisati Naro nogótacagaiguëri Obiro Caninarisonori, ² aroquenta pigáquina Naro Itingomi omagaro matsiguenga. Aisati yamai naganiataigairi antagaisati ira picoigaiguë ira popëna.

³ Obiro Tosorintsi paniro pini. Caninataque irogóiguëmi antagaisati matsiguenga. Aisati caninataque irogóiguëna Naro pigátane, Naro Jesoquirisito. Pairiraca ira ogóquinane Naro aisati irogóquimi Obiro, iro përosati intiomocái cara Jonogaguitequë. ⁴ Aroque nitsonquero ora pigáquena nanganque yaca quibatsica arota iraniacaninataiguemi matsiguenga. ⁵ Pabati, jiraisonoriguinte natiomotimi cara teraiquerai ine quibatsi iniacaninataiguëna omagaro. Yamai nanintini pomainaro nibega cara jirai nantsibatapaimi aisati iraniacaninataina.

Yamanocoqueri irogomere Jesus.

⁶ Aisati icanë Jesus:

—Ica picoigaiguëca popaiguënari yaca quibatsica nigótacaqueri atiraca picanta Obiro. Irirojegui pasi inabita aro popaiguënari cara iquemisantobëro Pinibare. ⁷ Yamai igóiguë omagaro cara nitasonganti aisati ora nogomequerira omagaro opaniaca cara Obiroquë. ⁸ Cara nopaiguëri Pinibare ora popabaquinara, iquemisantaigabaquero igóganaque yamai cara aisonori nopaniaca Obiroquë igóganaque aisonori pigáquina Obiro. ⁹ Namanocobintiri Naro irirojegu, irari te nomanocotiri ira te irogótina. Namanocobintiri paniro icaegui popaiguinaca irironta pasiatiegui. ¹⁰ Antagaisati ira nasi iriro pasi, ira pasiatiriro nasiati. Iroero iquemisantobitaiguëna aisati iniacaninataiguëna Naronta Itingomi. ¹¹ Naro quero përo cara nini quibatsiquë carari irirojegu përo cara irinaque quibatsiquë. Naro najátajeni Obiroquë nantsibatapaimi. Pabati Caninari, pingábintsaiguëri pisintsirequë icaegui popënaca arota inguengasëretaiguema aisati coshoni irogobaquima pibega Obiro aisa Naro aquengasëretanaca coshoni ogobaca. ¹² Cara niniquerai quibatsiquë nacábintsantaigacari pisintsire ira popaiguënara. Te pairi pegachane, paniro ira quimingarisonoriguinte ira jätënguitsi Sharincabeniquë arota omoncaratima Sanguenari. ¹³ Carari yamai najáqueni cara pinasegui Obiro. Yamai cara niniquerainta quibatsica ninibati negaca arota inganinasëretaiquanaque

nogomere aisati nacanta nacaninati Naro. ¹⁴ Naro nogomepëri ora Pinibare carari ira matsiguenga te inguemisante iguisaneinqueri nogomere tenta intsibataiguemarini irirojegui. Irironta nasiati icantina nibega Naro tenta nangantimari ira tsoengatsiri. ¹⁵ Te nomanimi páguiri jonoquë carari nomanaquemi pomisantiri arota quero yamatobitiri camagari yaca quibatsica. ¹⁶ Ira nogomere teni aisati ingantimari ira te inguemisante. Icantina nibega Naro te nangantimari ira tsoengatsiri. ¹⁷ Pigótacagui Pinibare ora aisonori arota inguengasannotantänëmiro cara poganinasëretaiqueri cara iriocairo ora te ongomeite. ¹⁸ Obironta agáquina yaca quibatsica, aisati Naro nigáguëri nogomere arota irogometagueigueri matsiguengajegui ora Pinibare. ¹⁹ Naquengasantimi Naati nomasantimi arota imasantaiguemi iriati nogomere aisonori inguengasantaiguemi irironta pasiati cara inguemisantiro Pinibare ora aisonori.

Jesos yamanocotiri omagaro quemisantatsiri.

²⁰ Përosati Jesos yamaniri Iriri:

—Nomanocotiri nogomerejeguica carari aisati nomanocotiri antagaisati ira quemisanquerone Pinibare cara ingomantanquero nogomere. ²¹ Nocogasanti antagaisati irirojegui inguengasëretaiganaquima aisati acanta ibega Eiro aquengasëretaca aisati coshoni ogaca Eiro, Pabati, pibega cara pini Naroquë aisati Obiro cara ninimi Obiroquë, arota coshoni irocái arota ira matsiguengajegui inguemisanquemi cara Obironta agáquina.

²² Aroque noniagaigacari cara acanta Eiro arota iraniacaninatacái aisati nopacari irojegui arota nantime iroquë ninanquimari, pibega Obiro pobabaquina Naro cara pinina Naroquë. Aisati inguengasëretaiganaquima irojegui arota coshoni irocái Eiro. ²³ Aintana Naro irojeguiquë Obiroquerai aintabi Naroica, arota intsibatobagaiguëma caninasati inguengaiguëma. Aro ira matsiguengajegui iraniaiguëri ica cara iquengaiganaca, irogóiguë cara Obiro agáquina aitosati pinintasantaiguiri icaegui pibeguina Naro cara pinintina. ²⁴ Cara terai ine quibatsi pinintina. Iroro popaguëtëna cara nosangueguiteti. Yamai, Pabati, nocoguini ira popaiguëna përosati irine Naroica arota iraniaiguena Naronta Itingomi. ²⁵ Pabati Caninarisonori, ira matsiguengajegui te irogótimi carari Naro nigótimi. Aisati igóiguë icaegui nogomereca cara pigáquina Obiro. ²⁶ Nigótacagaiguëri atiraca cara picanta Obiro, aiqero nigótasantacagaiganaqueri cara picanta Obiro cara pinintasantina Naro aisati pinintas-antacagaiguëri iro, arota ninantaiganaquimari Naro cara iraneingomentoquë.

18

Yáganëngani Jesus.

(Mt 26.36-56; Mr 14.43-50; Ir 22.39-53)

¹ Cara icaratanë inibatë Jesus isotocaiganaque cara Jerosarénquë Iro aisati irogomerejegui, cara iáiguë aiqero antatinta nijatini piriatininaro jítacha Serirón. Cara, icaiganaque Iro aisa irogomere panguirintsisiquë. ² Joras ira ágagantëri

Jesos aisati igótiro panguirintsisi tojaitaquentá yapatotaiga canta Jesos aisa irogomere. ³ Cara Joras yarepari Jesos, yamaigapëri soraro aisati ira omisantiro ibango Tosorintsi, ira igáiguë saseriroti aisati bariseo. Yamaigapë irobotanepague aisati irosataamento aisa isabirite aisati anchaqui. ⁴ Cara aroquentá igóque Jesos atiraca inganquimara iáque itonguibotobacari yosamitobëri:

—¿Pari picogaigui?

⁵ Yotabitaiganaqueri:

—Ira nocogui Jesos Nasaresati.

Jesos yotabitobëri:

—Naromë.

Aintasati itsibataigapari Joras ira ágagantëri Jesos. ⁶ Cara icanque Jesos “Naromë”, itëaiganaque itisitaquë, iparigaiganaque irojegui cara quibat-siquë.

⁷ Aisati yosamitaigairi Jesos:

—¿Pari picogaigui?

Icantaiganaqueri:

—Ira Jesos Nasaresati.

⁸ Yotabitanëri Jesos:

—Aroquemë nocomantaigabitëmi Naro Jesos. Picogaiguinaca Naro, pigátaigairi icaegui nogomere cara iriáigae.

⁹ Aro ocanca negaca arota omoncaratima ora irinibare Iriati cara icanqueri Iriri: “Ira popaiguënara te pari pegachane”. ¹⁰ Ainta poro irogomere Jesos jitacha Simón Peroro. Yáguëro isabirite itoguimitatëri iromeraro itingomi saseriroti, ira jitacha Máraco. ¹¹ Carari Ira Jesos igáqueri Peroro:

—Pomingairo pisabirite cara poguiroriquë. Iro-ro agáquina Pabati cara natsipiriaque. ¿Queroco nacantobitiri Iri-ro?

Yáganëngani Jesus catingasatiquë Anás.

(Mt 26.57-58; Mr 14.53-54; Ir 22.54)

¹² Aique ira soraro aisati igapitante aisati ira omisantiro ibango Tosorintsi yágaiguëri Jesus aique yoguëshobagotaiguëri. ¹³ Arotsita yágaiganaqueri ibangoquë Anás. Ira Anás iriconguiri Caijás. Iri-ro Caijás itingomi saseriroti irooti osarini. ¹⁴ Iriati ira Caijás icomantatsataiguëri cani jorío: “Caninataque poro sërari ira camobiquerine omagaro jorío iragabisaicotaiguëri”.

Peroro icantocoqueri Jesus te irogótiri.

(Mt 26.69-70; Mr 14.66-68; Ir 22.54-57)

¹⁵ Simón Peroro yoguiatabitanacari Jesus, aisati itsibatanacari basini irogomere. Ira basinira irogomere igótirinta itingomi saseriroti. Icanaque iriro irooti cara icaaganëngani Jesus iranguitërequë cara ibangoquë itingomi saseriroti. ¹⁶ Carari Peroro përo cara inë sotoquë. Aique isotogasipairi ira basinira irogomere ira igóti itingomi saseriroti. Inibatapëro ora omisantiro sitëcori cara inganaque Peroro. Aito ca icanaque. ¹⁷ Ora omisantiro sitëcori posamitobëri ira Peroro:

—¿Cagarico obiro irogomere inta tsomaguinta?

Yotabitanëro Peroro:

—Cagarina naro.

18 Arosonorinta catsingaguiteri ira iromeraro saseriroti aisati ira omisantiro ibango Tosorintsi yogamataiguë tsitsi cara irotataiguë. Peroro aisati itsibataigapari cara yotaigasegui ora tsitsi.

Ira itingomi saseriroti yosamitëri Jesus.

(Mt 26.59-66; Mr 14.55-64; Ir 22.66-71)

19 Ira itingomi saseriroti yosamitëri Jesus:

—¿Pairo ijitaiga pogomere? ¿Ati icarati? ¿Pairo pogomequeri?

20 Yotabitanëri Jesus icanëri:

—Iquemaiguëna antagaisati matsiguenga cara nogomequeri cara yapatoitaiga jorío aisati cara nogometaiguëri ibangoquë Tosorintsi. Carari tesonori nanibate comanoroni obirojeguiquë.

21 ¿Pairo posamitobiquina Naro? Posamitaigueri iraegui quemaiguëna. Iriro ogótatsi pairoraca ora nocomantaiguëri.

22 Cara inibatë Jesus negaca, ainta inasegui poro omisantiro ibango Tosorintsi, inchotangaborotëri icanqueri:

—¿Aroco picanta pipëgatsatari itingomi saseriroti?

23 Jesus yotabitanëri:

—Nacanqueroca ora te ongomeite, poniaguinaro. Carari ninibatëca caninasati ¿Pairo pinchotangaborobiriquina?

24 Aique Anás igáqueri iromeraro:

—Piguëshotigui. Páganëri cara Caijásiquë itingomi saseriroti.

Yogatsitairo Peroro icanai: “Teni nogótiri Jesus”.

(Mt 26.71-75; Mr 14.69-72; Ir 22.58-62)

25 Iroontita yosamitaiguëri Jesus, iriro-
querai Peroro yaratingasegui përosati cara
yotaigasegiuro tsitsi. Aro icantaiguëri:

—¿Cagarico obiro irogomere ira sërarira aisati?

Peroro aisati itsoiganaja icanai:

—Cagarina naro irogomere.

26 Ainta iromeraro ira itingomi saseriroti, imat-
siguenga ira itoguimitatë Peroro, yosamitëri:

—¿Teco naneimi cara pitsibatasegari Jesus cara
panguirintsisiquë?

27 Aisati itsoiganaja Peroro icanai:

—Teni nogótiri Jesus.

Aito cara icaimanë tiapa sërari.

Yágaiganaqueri Jesus cara Piratoquë.

(Mt 27.1-2, 11-14; Mr 15.1-5; Ir 23.1-5)

28 Coniamanisonoriquë ijocaiganaquero ibango
Caijás cara yágaiganaqueri Ira Jesus ibangoquë Pi-
rato ora jitacha peretorio. Cagarinta Pirato imat-
siguenga, ira joríojegui te ingaigue cara iban-
goquë arota quero yoguimingata. Aroca in-
gaiganaque iroguimingatëma quero yapaigui cara
Pásicoaquë cara iquengaiguëro joríojegui cara iso-
tocaigai Ejípitoquë jiraisonori. 29 Aique isotogopë
Pirato cara irinibaiguëri jorío icantaigapëri:

—¿Pairo icanque ica sërarica?

30 Yotabitaiganaqueri irirojegui:

—Aiti ora intagueque te onganinate. Querome
inti ora te onganinate, querome namiri obiroquë.

31 Icantaguëri Pirato:

—Págaiganaqueri obirojegui pingantaiguëri ora
ocomantimi isanguenare Moisés.

Carari yotabitaiganaqueri jorío:

—Teni iranintacaguina Iromasati nógaigueri pairiraca.

³² Aro ocanca cara omoncaraca ora icanque Jesus: “Iribëquëgotaguëna ira matsiguenga”.

³³ Pirato ipiganaja icanaji ibangoquë, aro icaimëri Jesus yosamitëri:

—¿Obiroco Itingomi joríojegui?

³⁴ Jesus icanëri:

—¿Posamitasitina obiati? ¿Aintaco basini comantëmi?

³⁵ Pirato yotabitanëri:

—¿Naroco jorío? Yamaigapëmi yaca narolica pomatsiguenga aisati itingomiëgui saseriroti. ¿Pairo picanque?

³⁶ Yotabitanëri Jesus:

—Cagarina Naro Itingomi yaca quibatsica. Narome Itingomi yaca, arome nagáqueri ira aguiataiguina inguisëcobentaiguenamero arota quero yágaiguina ira jorío. Naro cantënguicha cagarinanta Naro Itingomi yaca.

³⁷ Aro Pirato icanqueri:

—¿Aisonorico obiro Itingomi?

Yotabitanëri Jesus:

—Naro Itingomi cara picanquina obiro. Iroro nipoguëque. Niboguë yaca quibatsica arota nongomantaigueri matsiguenga caninaro Irinibare Tosorinti. Antagaisati ira coguiro ora aisonori inguemaquero ora nacanti.

³⁸ Yosamitëri Pirato:

—¿Pairo ojita picanti ora aisonori?

Cara icanque Pirato oca isotocanai aisati inibataigairi joríojegui icantaiguëri:

—Teni nogótiro pairoraca icantagueque ica sërarica ora te onganinate.

Irobaratairime Jesus Pirato.

(Mt 27.15-31; Mr 15.6-20; Ir 23.13-25)

³⁹ Aisati icanqueri Pirato:

—Pënibaque orequima Pásicoa cara obirojegui pametaiga nobarataimiri poro iromingaga. ¿Pin-intaiguico obirojegui nobarataimiri Itingomi jorío?

⁴⁰ Aro ira joríojegui icaimaiganaji catsiguesonori icantaiganaque:

—¡Ira quero! ¡Pobaratairi Barabás!

Ira Barabás irianti cosirinti.

19

¹ Aique ira Pirato yáguëri ira Jesus ipasatagantëri. ² Ira sorarojegui yobetsiquëneri Jesus imatseiro iroonti totsei, aro imatseitacaqueri iguitoquë. Aisati icaaguëri manchaguïntsi quiraaquisaamagori. ³ Aique iásitaigapëri cara inasegui Jesus icantomemegacari:

—¿Obiroco Itingomiegui jorío? ¡Intimeta Itingomi jorío!

Aisati incho tangaborotaiguëri cara iboroquë Jesus. ⁴ Aisati Pirato isotogopai cara joríojeguiquë icantaiguëri:

—Pinetsaiguëri cara nomisotogopëri yaca arota pigóiguë cara te naniatiri pairoraca ora icanque te onganinate.

⁵ Aito cara isotocanë Jesus imatseiparo totsei icapëro manchaguïntsi quiraaquisaamagori. Aro ira Pirato icanqueri joríojegui:

—Jerica sërarica.

⁶ Cara iniaigabaqueri itingomiegui saseriroti aisati ira omisantiro ibango Tosorintsi icaimaiganaque catsigue icantaiguë:

—¡Popëicotiri, popëicotiri!

Aro Pirato icantaiganaqueri:

—Yamai páganëri obirojegui popëicotaigueri obiro tenta naniatirini ora icantagueque te onganinate cara Iriroquë.

⁷ Carari ira jorío yotabitaiganaqueri:

—Naroeguiquë aiti Sanguenari ogometaiguina caninataque ingame ira jitapënguicha Itomi Tosorintsi.

⁸ Cara iquemobëro Pirato oca, itsorogasanotanë.

⁹ Aisati icanaji cara peretorioquë, yosamitairi aisati Jesus:

—¿Nega popaniaca Obiro?

Carari teni irotopitiri Jesus.

¹⁰ Aro icanëri Pirato:

—¿Pairo te potabitobitina? ¿Teco pigóte Naro itingomi? Cara nocoguica nagántëmi pëicotatsi aisati nocoguica nopabaquëajimi, aro nanganquero.

¹¹ Jesus yotabitanëri:

—Querome ipimiro Tosorintsi, quero picantëmatina Naro. Obiro picantabequina ora te onganinate carari ira mapëna yaca iriro cantasantëro te ongomeite.

¹² Irooti icogantabitanaca Pirato irapabaquëajirime Jesus. Iroero cantanaacha cara icaimaiganaji jorío:

—Aroca popabaquëajiri Ira, te pomatsiguengati-mari Sésar. Ira cantasitënguicha: “Naro itingomi”. Iriro Ira quisaneinqueri Sésar pitingomi.

Pirato ipaiguëri joríojegui Ira Jesus.

13 Cara iquemobëro Pirato ora inibataiguë jorío, igátaiguëri ira soraro iromisotoqueri Ira Jesus. Yamai iriroque Pirato sobiaquenguitsi iragáantomentoquë jonoica mopë cara yoganinatiro iroro ojita cara irinibarequë ebereo Gabata. 14 Cara coniamaniquë yobetsicaiguëro Pásicoa, aro icanëri Pirato ira joríojegui:

—¡Jerica Pitingomi!

15 Carari irirojegui icaimaiganaque catsiguesonori:

—¡Páganëri! ¡Ingameta! ¡Popëicotiri!

Pirato icanëri:

—¿Naroco pëquëgotërine Ira Pitingomieguira?

Aro ira itingomi saseriroti yotabitanëri:

—Naroegui teni irine basini natingomi. Paniro ira Sésar.

16 Aito cara ira Pirato ipaiguëri joríojegui Jesus cara iribëquëgotaiguëri.

Cara ipëicotaiguëri Jesus.

(Mt 27.32-44; Mr 15.21-32; Ir 23.26-43)

Irooti cara yágaiganaqueri soraro. 17 Yamai Jesus isotocanë yanatanëro igorosite. Iáque cara oguitojaquë ora ojita Iguito Camatsirini. Aisati irinibarequë ebereo ojita Górogota. 18 Cara ipëicotaiguëri corosiquë, itsibatacari pite sërari ira ipëicoque aisati cara corosiquë basini. Poro inënguitsi ibacosonoriguë Jesus, basini inë imatepacoquë, carari Ira Jesus Iriro inënguitsi aganguisati. 19 Pirato igáantëneri sanguenari iroquineri jonoica iguitoquë Jesus. Ocanti oca sanguenarica: “Jesus Nasaresati Iriro Itingomi

jorío”. ²⁰ Ipëicoqueri Jesus aronisatiquë Jerosarén: iroro ora ipocasitaigaguëtapëri arosonori joríojegui iraniaiguëri. Inibataiguëro jorío ora sanguenari osanguenaca maba nibarintsiquë cara irinibarequë ebereo, aisati guiriego, aisati irinibarequë Iromasati.

²¹ Carari ira itingomiegui saseriroti icantaiguëri ira Pirato:

—Quero pisanguenatiro: “Itingomijorío”. Orari pisanguenate: “Icanque Iriro: ‘Naro Itingomijorío’ ”.

²² Carari ira Pirato yotabitanëri:

—Ora nasanguenaque, ineta.

²³ Cara ira soraro itsonqueri ipëicotaiguëri Jesus yágaiguëro ora imanchaqui ipabacaguëcaro icaratinta itsibasati. Aisati yáguëro igamisate ora te ontatima oaga omagatiro. ²⁴ Ira soraro icantobaganaca:

—Quero atisaraaiguiro. Intsome omaguimpibintiro arota ogóigue pairiraca áganërone.

Yamai aroque imoncaraquero soraro Sanguenari cara ocanti:

Ipabacaguetaigacaro nomanchaqui, aisati imaguimpibintëro nagamisate.

²⁵ Cara aronisati igorositequë Jesus pinaigasegui iniro Jesus aisati irento, aisati María iina Queriojás. Aintasati pinasegui María Magararasato. ²⁶ Ira Jesus cara iniaquero iniro pinasegui cara otsitiquë igorosite otsipasigari poro irogomere ira inintasantë Jesus, icanquero iniro:

—Ina, iriro pitomitsari ira.

²⁷ Aro icanquero ira irogomere:

—Iroso pinirotsari ora.

Irooti cataguiteri que ira irogomere yáganairo ibangoque yomisantéro iniro Jesus.

Cara icamaque Jesus.

(Mt 27.45-56; Mr 15.33-41; Ir 23.44-49)

²⁸ Cara igóque Jesus aroque imoncaraquero antagaisati Sanguenari, icanque:

—Nomiretëni.

²⁹ Aiti pinasegui cobiti piagasegaro oja oba cochoari. Aro yogaatëneri chomigatiro cara obaaque yoguëro chocopique ipëri Jesus cara ibaganteque. ³⁰ Cara ichomicobëro Jesus icanë:

—Nitsonquero antagaisati natarobacaare ora igáquina Pabati.

Aro imentsononganaca Jesus ipëri Isëre Iriri, icamanë.

Poro soraro yosataaqueri Jesus.

³¹ Iroso cataguiteri cara yobetsicaiguiro jorío Pásicoa. Onguëtaguetanë iroonti sábaro caninaro asi Pasicoa. Tenta iraninte jorío irine igamaga cara corosique sábaroque, iroso ora yamanaguëqueri ira Pirato cara iragáqueri soraro intingaraaguetiri imingaaque ira pëicotaigasegacha aisati iraguëtaigairi. ³² Aro iátasiqueri soraro itingaraaigapëri imingaaque ira obasigatsira aisati basini ira itsipasiga Jesus. ³³ Cara iniopëri Jesus aroque icamaque; iroso ora te intingaraaguëtiri imingaaque.

³⁴ Carari ainta poro soraro yosataantapari irosataamento imeriquique. Irooti cara pisotoatanë iraraa aisati nija. ³⁵ Ira comantairo oca iriro neiro isanguenaquero ora aisonori.

Yamai igótasantiro iriro aisonori arota obirojegui pinguemisantaiguero cara pinibataiguëro oca Sanguenarica. ³⁶ Aro ocantagueca negaca arota omoncaratima ora Sanguenari cara ocanti:

Quero itingaraitiri poro itongui.

³⁷ Aisati ocanti basini Sanguenari:

Aro iraniaigairi Quirisito Ira yosataaque.

Cara itiaqueri Jesus.

(Mt 27.57-61; Mr 15.42-47; Ir 23.50-56)

³⁸ Aique ira José ira paniacha poeboroquë jita-cha Arimatea yamanopëri Pirato cara iráganëri igamaga Jesus. José iriro ira aguiatabitari Jesus comanoroni, itsoroquerininta jorío. Aro ira Pirato inintacaqueri ira José. Aro yáganeri igamaga Jesus. ³⁹ Aisati yarepa Nicoremo ira nibaqueri Jesus jirai tsitiniriquë. Yamapë 30 quiro casangajengaro ojita mira aisati ároes. ⁴⁰ Aique José aisati Nicoremo yágaiganaqueri igamaga Jesus iponatan-taigacari tocoya aisati casangajengaro aronta icantaiguero iriro cara yametaigaro joríojegui cara itiaiguiri igamaga. ⁴¹ Cara ipëicotaiguëri Jesus aiti panguirintsisi aronisati aiti pinasegui iritijomento irorai terai iritijantimaro. ⁴² Aro cara itiaqueri Jesus aitioniati pinasegui iritijomento aro-quentá pënibaque omarintanëma sábaro.

20

Cara icaniatanai Jesus.

(Mt 28.1-10; Mr 16.1-8; Ir 24.1-11)

¹ Cara coniamanisonoriquë cataguiteriquë tom-inco, piáque María Magararasato cara itiaica Jesus, cara terai onguëtaguetasante, oniopëro oquibe

mopë aroque pasiríaa. ² Pisigasanotanaca María Magararasato cara inasegui Simón Peroro aisati inasegui ira irogomere Jesus ira inintasanoti, ocantaigapëri:

—Yáguëqueri Atingomi. Teni irinaje cara itiabecariri. Teni nogóte negaraca yogairi.

Inetsaigabitaari Peroro aisa Joan.

(Ir 24.12)

³ Ira Peroro aisati basini irogomere isotocaiganaque iáiguë cara itiaa Jesus. ⁴ Pitirooti isigaiganaca, carari ira basini irogomere iriro sigasantanënguicha ibatanëri Peroro iritsita arequenguicha. ⁵ Inetopisigapëro cara itiaa Jesus iniopëro tocoya aroque papinaguiricaa, carari te ingue. ⁶ Aique yarepa Simón Peroro icanaque iriro cara itiaa Jesus. Aisati iriro iniopëro ora tocoyatsa aroque papinaguiricaa. ⁷ Ora tocoya ora yoguëneri iguitoquë casiriconiati pinasegui caninasati. ⁸ Ira iritsita arepënguicha naarai icanaque iriro yamai. Iniajiro tocoya yamai iquemisanque ⁹ teraiquerainta inguengairo cara ocanque Sanguenari Ira Jesus inganiatanae. ¹⁰ Yamai ipigaiganaja pitirooti irogomere Jesus cara ibangoquë.

Ira Jesus yoniagapaaro ora María Magararasato.

(Mr 16.9-11)

¹¹ Ora María përo cara pinë sotoquë aronisatiquë iritijomento piraca. Cara piragasega onetopique aiqero tsomagui ¹² oniaqueri pite ironomire Tosorintsi iquiro catarisonori imanchaqui. Isobiaque cara inabitaca Jesus.

Poru inënguitsi cara iguitoquë Jesus, ira basini ironomire inasegui cara iguitiquë. ¹³ Yosamitëro:

—Tsinane, ¿Pairo piraicoque?

Iroo ocanqueri:

—Niraicoqueri Natingomi yáganënganinta te nogóte negaraca yogairi.

¹⁴ Cara pitsonque María pinibatë, papisitanaca aiqero otisitaquë, oniaqueri Jesus carari te ogótiri. ¹⁵ Aro yosamitapëro Jesus:

—Tsinane, ¿Pairo piraicoque? ¿Pairo picogui?

Iroo ojiqueri ira omisantiro panguirintsisi, aro ocanqueri:

—¿Obiroco áganairi Natingomi? Pingomantina negaraca pogairi. Nocoguini náganairi naro.

¹⁶ Jesus icanquero:

—¡María!

Onetsairi aisati ocanqueri nibarintsiquë jitacha ebereo:

—¡Ogometinari!

¹⁷ Ira Jesus icampëro:

—Popabaquëina terainta najáte cara íniro Pabati. Yamai pijáte pingantaigapëri naguemisan-tacagane ira quemisantaiguina pingantiri cara aique nogainocanëma cara Pabatiquë nasi aisati pasiegui Piri. Ira Tosorintsi nasi aisati Iriro Pitosorintsite obiro.

¹⁸ Aito cara piáque María Magararasato cara ongomantaigapëri ira irogomerejegui ocampëri:

—¡Naniajiri Atingomi!

Aisati ocomantaiguëri omagaro ora icanquero Jesus.

*Jesus yoniagaigapaari ira irogomerejegui.
(Mt 28.16-20; Mr 16.12-18; Ir 24.36-49)*

19 Aro irooti cataguiteri tominco chopiniguite yapatoitaigasega irogomere Jesus. Aro yasitaiguëro sitëcori itsorogaiguërininta joríojegui. Aro iquëgotapëri Jesus yaratingopë aganguisatiquë cara irogomerejeguiquë. Yobetsatapaari icampëri:

—Obirojegui, pomagoriasëretaigue.

20 Cara icampëri oca, yoniagaigapaari ibaco aisati cara imeriquiquë cara yosataaqueri soraro. Ira irogomerejegui icaninatasantaiganaji cara ini-aigabajiri Itingomi. 21 Aisati yogatsitairi Jesus icantajiri:

—Obirojegui, pomagoriasëretaigue. Cara igáquina Pabati Naro jirai, aisati Naro nagátaiguëmini obirojegui yamai.

22 Irooti cara itasongaiguëri iirojegui ican-queri:

—Coraque pinampëmi Caninaro Isëre Tosorintsi. 23 Ira matsiguenga comantaguetirine Tosorintsi ora icantagueti te onganinate aisati inguemisanquena Naro, pingantiri: “Aroque ijocajimiro yomaguisanquimiro Tosorintsi ora picantaguetomotiri te onganinate. Teni inguisaneintajimi”. Aintaca matsiguenga ira te ingomantaguetiri Tosorintsi ora icanti te onganinate, pingantiri: “Querootisati ijocajimiro Tosorintsi ora picantaguetomotiri te onganinate. Përosati iguisaneinquimi”.

24 Cara yoniagaigapaari Jesus irogomerejegui te irinasegue Tomás ira jitacha aisati Tsipari. Basiniegui irogomere icomantairi Tomás:

—Naniaigairi Ira Atingomi.

25 Icanque ira Tomás:

—Queroca naneiro ibacoquë cara oquenaqueri carabo, queroca nominguero nobatsapaco, que-rootisatica nominguero nobaco cara yosataaqueri soraro, quero naquemisanti.

Jesos yoniagaari aisati irogomerejegui.

²⁶ Pabisanaque 8 cataguiteri. Aisati yapa-toitaiga antagaisati irogomere Jesus cara pongot-siquë. Aisati yasitocoigasega. Yamaica ainta Tomás itsipaisigari irirojegui. Aisati iquëgotapairi Jesus inasegopë aganguisati irogomerejeguiquë, yobetsatapaari icampëri:

—Obirojegui pomagoriasëretaigne.

²⁷ Aique icampëri Tomás:

—Pinetsero nobaco. Pominguero pobatsapaco. Aisati pominguero pobaco yaca yosataaquina soraro. Quero pitsoinguina, pinguemisantina.

²⁸ Aique yotabitanëri Tomás:

—Obiro Natingomisonori, aisati Obiro Notosor-intsite.

²⁹ Jesus icanqueri:

—Tomás, aroquenta piniaquena yamai, piquemisanquina. Ainta basini ira te iraneina carari iquemisantaiguëna. Ingani-natasanoiganaque iriro.

³⁰ Jesus itasongasantomotaiguëri irogomere tojai ora te osanguenatima yaca Sanguenarica.

³¹ Ora itasonganque Jesus osanguenaca yaca Sanguenarica arota obirojegui pinguemisan-taigueri Jesus Iriro Quirisito ora ocanti Agabisaicoontatsiri. Iriro Itomi Tosorintsi. Aroca pinguemisanqueri përosati cara pintiomoqueri Iriro Jonogaguitequë.

21

Jesos yoniagapaari irogomere icarati 7.

¹ Aique Jesos yoniagapaari aisati irogomere cara onamijaquë angaare jitacha Tiberias. Yoniagapaari negaca. ² Cara, inasegaigui ira Simón Peroro aisati Tomás ira ijita Tsipari. Aisati Natanael ira paniacha poeboroquë jitacha Caná cara Garireaquë, aisati ira itomijegui Sebereo, aisati pite basini irogomere. ³ Aro ira Simón Peroro icantaiguëri:

—Aique najáque nasiriatëni.

Aique icantaiganaque iriro:

—Aisati narogui naguiataiganaquemi.

Iáiguë yotetaiganacaro pitotsi, isiriataigabitaca omagaro tsitiriquë, cara te iráguëmate. ⁴ Cara pëmbaque onguëtaguetanë, Jesos inasegui onamijaquë angaare, carari irogomere te irogóigueri Iriri.

⁵ Aro Ira Jesos icaimëri:

—Janequijegui, ¿Te págaigue sima?

Yotabitaiganaqueri irirojegui:

—Teni.

⁶ Aique igáqueri:

—Atsi pijoquiro pisiritite aiquero pobacasonoriquë, aro págaiguëri sima.

Aro ijocaiguëro. Yamai te iragabaiiro intinaajiro isiritite icaronta sima. ⁷ Cara iniaqueri arosonori sima aito icanque ira inintasanoti Jesos:

—¡Iriri Atingomi!

Cara iquemobë Simón Peroro Iriri Itingomi icanaquero imanchaqui saacanarinta inasegui, imatsecanë cara angaarequë. ⁸ Iraegui basini

irogomere yaretacaganaaro pitotsi cara onamijaquë inosicaiganaquero isiritite jagacanta sima. Aitoniatinta onamija omoncarata 100 metoro. ⁹ Cara yaguëtaiganaque quibatsiquë iniaigapëro tsitsi itasisiga paniro sima aisati pan. ¹⁰ Jesus icantaigabaqueri:

—Pomaigapë sima ira pisiriataiguëra yamai.

¹¹ Simón Peroro yotetanaa pitotsiquë, inosicapëro siriti irooti cara onamijaquë iacaro sima iriantisonori iguibe icarati 153, tojai inabita carari te ontisaraaima siriti. ¹² Aro icantaiguëri Jesus:

—Omana popaigapë.

Carari te irine poro irogomere ira osamitirine pairiraca ijita, igóiguërinta Iriro Itingomi. ¹³ Aique Jesus yáguëro pan ipaiguëri irogomere aisati ipaiguëri sima. ¹⁴ Yamai ocarati maba cara yoniagaari irogomerejegui cara aroque icamaque icaniatanai Jesus.

Jesus inibataqueri ira Simón Peroro.

¹⁵ Cara itsongaiguë yapë, Jesus yosamitëri Simón Peroro:

—Simón itomi Jonás, ¿Pinintasantina Naro pibegaiguiri icaegui? ¿Pinintasanotina obiro?

Yotabitanëri Peroro:

—Jee, Natingomi, Obiro ogótatsi nanintimi.

Icanëri Jesus:

—Yamai pingantimari ira omisantiri itiomijani oisha. Pomisantaiguenari ira quemisanquina.

¹⁶ Yogatsitairi Jesus yosamitairi:

—Simón itomi Jonás, ¿Pinintasantina?

Yotabitanëri Peroro:

—Jee, Natingomi, Obiro ogótatsi nanintimi.

Icanqueri Jesus:

—Yamai pomisantinari noishate.

¹⁷ Mabatanë yosamitairi:

—Simón itomi Jonás, ¿Pinintina?

Yamai Perero yogasëretanaca yosamitërinta ocarati maba aisonorica inintiri. Icanqueri:

—Natingomi, Obiro ogótiro antagaisati. Pigóti cara nanintimi.

Icanëri Jesus:

—Pomisantinari noishate. ¹⁸ Nangantasantëmini aisonori, cara jirai oboinaqueraibi piquiro pomanchaqui obineni piátagueque cara negaraca picogui pijáte. Carari cara pintiasiparitanë pintimagonaguitëma ira basini iriro caaguëmirone pomanchaqui aique iráganëmi cara te pininte pijáte.

¹⁹ Aro icanqueri negaca Jesus. Irooti yogomeantari aisati icomantëri atiraca inganquima Perero cara ingamaquenica, inganqueri matsiguenga iraniacaninatobëri Tosorintsi. Aique Jesus icanëri:

—Piguiatapëna.

Ira irogomere iranintane Jesus.

²⁰ Cara yapisitaanaca Perero, iniobëri cara yoguiataiganaqueri ira irogomere inintasanti Jesus. Iriati ira itsipasiga coshoni Ira Jesus cara yapaigasegui cani aisati yosamitëri: “Natingomi, ¿Pari ijita ira ágagantëmine?”

²¹ Cara iniobëri Perero, yosamitëri Ira Jesus:

—Natingomi ¿Iriroque ica, ati inganquima?

²² Yotabitanëri Jesus:

—Aroca naninque Naro intimaque irooti cara nopigaima Naro, quero pogasëreta obiro. Obiro piguiatapëna.

²³ Aique iquemaigabaquero omagaro quemisantatsiri ijítabetaigaca quero icami ira irogomere inintasanoti Jesus. Carari Jesus te ingantiri cara quero icami. Patiरो icanqueri: “Aroca naninque Naro intimaque irooti cara nopigaima Naro, quero pogasëreta obiro”.

²⁴ Iriati ica irogomere neiro oca aisati iriatisati sanguenatëro. Eiro ogóiguëro cara icanque aisonori.

²⁵ Aiti arosonori ora icantagueque Jesus. Arome irisanguenatëro patiopague oca, querome cotinguiboro omagaro quibatsiquë ora sanguenatënguichaneme. *Joan*

**Irinibare Tosorintsi Ocomantë^{gotëri}
Antigomi Jesoquirisito
New Testament in Nomatsiguenga
(PE:not:Nomatsiguenga)**

copyright © 2008 Wycliffe Bible Translators, Inc.

Language: Nomatsiguenga

Translation by: Wycliffe Bible Translators, Inc.

Nomatsiguenga [not], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nomatsiguenga

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

cc057d06-df39-5d12-b492-cf028fb9485d